



楚紀卷之四十一

皇明賜進士 經筵日講同修國史奉直大夫前翰林院侍讀學士廖道南謹撰
考履內紀前篇

履之為道以定民志見危授命充義至顛堅定
不渝周旋不匱歷千載餘環兩間內我思古人
庶幾無愧撰考履內紀前篇

潘旭

子叔黨 附 大夫 逢伯

潘旭字師叔楚大夫初庸人率群蠻以叛楚囚于揚
窓三宿而逸請起王卒潘旭曰不可姑再與之遇
以驕彼彼驕我怒而後可克此先君蚡冒所以服

陘隰也楚子從之會師于臨崑分為三隊闔椒子
越自石溪子貝自仍以伐庸厥後楚子伐鄭潘尪
入盟尪之子叔黨從事于邲之戰逐魏錡楚子乘
左廣以逐趙旃叔黨望車塵曰晉師至矣楚子使
唐狡與蔡鳩居告唐惠侯使叔黨率游闕四十乘
隨唐侯為左偃克之遂次于衡雍叔黨曰君去盍築
武庫而收晉尸為京觀焉臣聞克敵必示子孫無
忘武功也時有逢伯者楚子圍許許男面縛啣璧
大夫衰經士輿襯楚子問之逢伯對曰武王克殷
微子啓如是武王親釋其縛受其璧而赦之焚其

襯禮而命之使復其所楚子從之

史南曰君子善善長惡惡短者何善不積不足
以成名惡不積不足以殺身勿謂善小而為
勿謂惡小為之此先哲所為錄微善略小過也
潘尪之策彼善于此叔黨京觀之封逢伯釋縛
之對猶足祛楚子之惑也是故善善惡惡天道
章矣贊曰師叔善謀群蠻退師叔黨從邲晉人
罔窺君子取之各有攸宜

馬武

樊宏

馬武字子張其先南陽湖陽人也少時避讎客居江

夏王莽末竟陵西陽三老起兵郡界武從之後入
當陽綠林中與漢軍合更始立以武為侍郎與世
祖破王尋等拜振威將軍世祖即位以武為侍中
騎都尉封山都侯十三年更封郇侯又為楊虛侯
二十五年將兵擊武陵蠻顯宗初復拜捕勇將軍
永平四年卒檀嗣孫震封濛亭侯

樊宏字靡陽其先南陽湖陽人用中山甫封于樊今
為樊城宏父重字君雲善營產業陂渠灌溉露閭
鄉閭宏少有志行為世祖元舅拜光祿大夫位特
進封長羅侯弟丹為射陽侯兄子尋玄鄉侯族兄
忠更父侯世祖幸湖陽追封壽張敬侯子儵嗣復
封少子茂為平望侯兄子梵為大鴻臚曾孫準為
御史中丞兼尚書令光祿勳

史南曰臣攷襄志以岑彭岑晫為棗陽人及讀
范曄漢書皆棘陽人也光武起春陵而諸將多
出南陽其義陽湖陽冠軍宛葉皆楚舊域也矧
樊城為山甫肇封而馬武樊宏俱有遺蹟矣乎
贊曰子張江夏客游有蹤靡陽樊城戚聯是封
漢水為池方城攸崇于以彰之考履來同

谷朗

谷險

劉優

考厥內經前 卷四十一 三
谷朗未陽人事繼母以孝聞東漢時仕至大中大夫
值交南叛朗往征之恩威大著遷九真太守厥後
子姓多占士籍冒谷永者非是

谷險桂陽人少有志行晉元帝時其卓為湘州刺史
禮聘之險赴臺試以高等除中郎時南土凋荒經
籍道息險辭居家研精理術恥于衒耀鄉閭稱之
劉優零陵人父綽自彭城起家出補零陵太守優少
有雋聲舉孝廉漢獻帝時為御史大夫遷尚書僕
射孫敏弱冠與蔣琬俱知名舉孝廉後主劉禪時
為揚威將軍魏曹爽侵蜀敏與大將軍王平率眾

迎敵多張旗幟餘百十里會費禕至魏軍退以功
封雲亭侯

史南曰臣讀衡州志以谷永為未陽人考諸漢
書永字子雲長安人也永州志以劉敏為劉巴
父考諸三國志劉巴父名祥為江夏太守乃知
文獻不足徵故也贊曰谷朗孝廉交南樹勳谷
險繼之高尚不屈劉優之始彭城肇跡劉敏仲
蜀降魏可盡

蔣晉 魯譚

蔣晉零陵人漢靈帝時舉孝廉授尚書朗出補汝南

太守遷交州刺史召入奏事應對不滯拜尚書僕射在位清直為群僚所服

曾譚零陵人舉孝廉歷尚書郎仕至太常卿

史南曰蔣晉曾譚具載未志然而晉之獨持風裁尚之屢著勲庸皆可書也贊曰蔣晉仕漢綽有才名交州召入僕射列卿曾譚受辟群工見欽愛蒐鑿簡以彰厥名

蔡瑁 李衡

蔡瑁字德珪襄陽人少為曹操所知劉宗之敗操入其家呼見妻子是時瑁家在蔡洲室美豪宕別業

佳玩蔡諷姊適太尉張溫長女為黃彥承妻小女為劉景升後婦即瑁姊也瑁弟瓚字茂素為鄢相琰字文珪為巴郡太守劉表時瑁為江夏郡竟陵太守鎮南將軍仕魏為從事中郎司馬長水校尉封漢陽亭侯嗣後有蔡道貴者拳勇多智時人擬之關雲長云

李衡字叔平襄陽人習笠以女英習配之漢末仕為丹陽太守孫休在丹陽數以法繩之英習每從中規不聽會孫亮廢休立衡懼及禍英習曰瑯琊王好善慕名博學深廣君可自詣獄請罪衡從之可

下令曰丹陽守李衡以往事之嫌自拘有司夫斬
祛射鈞在古為忠其加威遠將軍還郡衡還武陵
種橘龍陽洲土勅兒曰吾州里有千頭木奴汝食
歲上千匹絹亦是用爾

史南曰臣觀水經沔水又東南逕蔡洲注云洲
西有泔水色常綠長水校尉居之及李衡種橘
龍洲上事亦相類嗟乎州一也而今安在哉是
故君子以仁為宅以禮為基而蔡李之豪侈不
與焉贊曰蔡瑁世族曹瞞相與直入其宅呼為
爾汝李衡仕吳種橘洲渚英習之賢式譽與處

鄧騫 子繁 附

鄧騫字長真長沙人少有志氣為鄉鄰所重暨刺史
譙王承命為主薄使說甘卓曰桓將軍以私憾稱
兵象魏實失天下心此忠臣義士匡救之時也昔
魯連匹夫猶懷蹈海之志况受任方伯位同體國
者乎今因天人之心倡桓文之舉伏大順以掃逆
節擁義兵以勤王室千載一時也卓笑曰吾當盡
力國難耳騫曰今既不義舉又不承檄此必至之
禍也釋必勝之策坐待危亡不可言智矣卓留為
參軍欲與同行以母老辭承為魏人所敗以虞悝

兄弟為承黨又盡誅之求寯甚急鄉人為之懼寯
笑曰欲用我耳彼新得州多戮忠良是其求賢之
時豈以行人為罪乃往詣又喜曰君所謂古之
解揚也以為別駕寯識量弘遠善與人交久而益
敬大尉庾亮稱為長者歷武陵始興太守遷太司
農卒於官子粲

鄧粲少以高潔著名與南陽劉麟之南郡劉尚公同
志友善並不應州郡辟命荊州刺史桓冲卑辭厚
禮請粲為別駕粲嘉其好賢乃起應召麟之尚公
謂曰卿道廣學深眾所惟懷忽然改節誠失所望

此人不以入園
出二門之謂也

粲荅曰足下有志於隱而未知隱夫隱之為道朝
市皆隱在我不在物也尚公等不吝然粲譽亦頓
減矣後患足疾不能朝求去職不聽令卧視事後
以病篤乞骸許之粲以父寯有忠信言而世無知
者乃著元明紀十篇注老子並存于世

史南曰鄧氏父子一則從魏又以前利一則從
桓冲以釣名回視虞悝易雄之死劉麟之劉南
公之隱真有覲矣贊曰鄧寯豪俠見敵不疑委
身事之司農可為粲亦著名桓冲辟之城市山
林疇測其宜

嚴植之

祭元恭

嚴植之字孝源秭歸人少善老莊晚通周易毛詩左氏春秋鄭氏禮書梁天監中辟為五經博士開館授徒居潮溝生儒常數百人講說精當後遷中撫軍記室參軍

蔡元恭江陵人父名大業仕後梁為左民尚書元恭美姿容工於詩仕隋為起居舍人煬帝有所賦必令諷誦遣教官人俾入宮改內史舍人元恭恥之由是踈斥所著有後梁春秋

史南曰臣觀荆志乃見嚴植之蔡元恭咸以文學置位通顯及攷梁書唐書乃知二子之行不同一則發經史之精蘊於梁武捨身之時一則著春秋之大義於煬帝荒淫之日均之取其文焉爾矣贊曰孝源博洽開館授徒潮溝居肆充棟文腴元恭精密為掖庭師後梁遷鼎載筆紀時

段文昌

段承式附

段文昌字墨卿其先臨淄人世客荊州疏爽任節不為齷齪小行節度使裴胃禮之胃採古今禮要為書數從文昌質所疑後依韋臯為校書郎宰相李

吉甫才之授登封尉集賢校理再遷左補闕憲宗
數欲親用為常貴之所詆貴之罷用為翰林學士
遷中書舍人遂為承旨穆宗即位召入思政殿顧
問率至夕乃出俄拜中書侍郎同中書門下平章
事未踰年自表還政授劔南西川節度使文昌素
諳蜀利病治尚寬靜間以威斷群蠻震服長慶二
年黔中蠻叛觀察使崔元略以問文昌遣使開曉
蠻即引還彭漢蠻大酋嗟祿來請立石刊誓修貢
獻入遷兵部尚書文宗立拜御史大夫進鄒平郡
公俄檢校尚書右僕射平章事太和四年徙帥荆

南謠曰旱不苦禱而雨雨不愁公出游南詔叛帝
以文昌得蠻夷心詔使遺檄責讓即日解去復節
度西川九年卒贈太尉

段成式字柯古文昌之族也仕至太常少卿寓襄陽
木香村撰楊柳宮詞後徙辰州撰酉陽雜俎自叙
曰夫易象一車之言近於怪也詩言南箕之奧近
乎戲也若夫禮味太羨史為折俎炙鴉羞鬯豈容
下著乎成式無崔駟真龍之嘆有孔璋畫虎之譏
乃撰書三十卷

史南曰臣攷唐書見段文昌祖基俱在荊州每

歲時享祀必歌舞以為樂識禮者譏之及重撰
裴度淮西碑世固訾之視韓昌黎為何如者至
承式宮詞之作雜俎之著則不啻為太玄覆瓿
之緒餘焉耳贊曰文昌固才孰與翰公文章日
月淮西紀功成式蚤慧宮詞雖工酉陽雜著綽
有文風

李遜 弟建

李遜字友道魏申公發之後也客居荊州初署山南
東道掌書記累遷濠州刺史濠兵謀殺其將楊騰
因滅騰家遜至諭以利害衆釋鎧自歸觀察使歛

利自殖遜一不應入為虞部郎中由衢州刺史以
政最擢浙東觀察使貞元初代嚴綬為山南東道
節度使時方討蔡析山南東道為兩節度以唐鄧
隋三州授高霞寓得專攻討而遜督襄復郢均房
五州餽餉初襄陽兵隸霞寓者多逃後霞寓戰不
勝言為遜所撓帝欲按狀宰相請置不問左遷太
子賓客中人誣之更貶為恩王傳父乃歷京兆尹
國子祭酒以檢校禮部尚書為忠武節度使未幾
徙節鳳翔過京師以疾求解為刑部尚書卒年六
十三贈尚書右僕射謚曰貞子方玄字景業弟進

士裴誼奏署江西判官終處州刺史初遜在襄郢
韓文公送之詩云帝憂南國切改命付忠良壤畫
星搖動旗分獸歟揚五營兵轉肅千里地還方控
帶荆門遠飄浮漢水長賜書寬屬郡戰馬隔鄰疆
縱獵雷霆迅觀碁玉石忙風流峴首客花豔大堤
倡富貴由身致誰教不自強亦可想見其爲人矣
柳子元亦有啓謝

李建字杓直與兄遜俱客荊州鄉人爭鬪不詣府而
詣建平決無頗母憐其孝每字之曰倭子勸食進
藥吾意甚愜貞元中補校書郎德宗思得文學士

宰相鄭珣瑜曰臣爲吏部時當補校書者八人他
皆藉貴勢以請建獨無有擢左拾遺翰林學士順
宗立李師古侵曹州建作詔諭詞不假借王叔文
欲更之建不從除太子詹事改殿中侍御史以兵
部郎中知制誥宰相有竄定詔橐者函請解職除
京兆尹會遜被譏建申治之出爲澧州刺史召拜
刑部侍郎卒贈工部尚書始建家貧兄造知其賢
爲成就之故遜建皆舉進士後通顯未嘗置垣屋
以河儉稱建子訥字敦止及進士第累遷中書舍
人爲浙江觀察使性疏下遇士及以禮爲下所逐

夫何... 卷四十一
貶朗州刺史召為河南尹歷兵部尚書以太子太
傅卒初建在澧州柳宗元為永州司馬上書略云
永州在楚為最南僕悶即出游持到幽樹好石暫
得一咲杓直以為誠然乎其寄與曠達類如此
史南曰臣攷荆志載遜建事不數語及觀唐書
乃見遜之被譖于高霞寓建之抗節于王叔文
且韓公之詩柳子之書交輝並美亦卓爾不群
矣贊曰申公之後子姓多賢友道督餉五州爭
先杓直校書八人讓能韓公賦詩藻翰星聯柳
子上書水石霞連君子考復正直無愆

何堅

孟瑄

附

二

三

四

五

六

七

何堅道州人唐德宗時舉進士時楊憑鎮湖南陽城
為道州守堅見舉于韓愈故愈贈之文曰堅以進
士舉于吾為同業其在太學也吾為博士堅為生
為同道其識堅也十年為故人堅歸倡其州之父
老子弟服陽公之令道亦倡其縣與其比州服楊
公之令吾聞鳥有鳳恒出於有道之國漢時黃霸
為潁川是鳥集而鳴焉堅歸吾將賀其見鳳而鳴
也已厥後有何仲舉何嗣全何洵直何誼直何齋
皆堅之裔俱以茂才舉甲科仲舉登後唐長興間

進士與范質為同榜仕至天策府學士盩後更名
棄登宋政和間進士為隨州倅改雅州累官朝請
大夫
孟瑄郴州人唐元和間五年崔樞知貢舉試洪鍾待
撞賦舉進士韓愈贈之文曰今年秋見孟氏子于
郴年甚少禮甚度手其文一編甚鉅吾固心存而
目識之矣十月吾道於衡潭累見之其所與偕盡
善人長者吾以是益竒之京師進士以千數吾嘗
折肱焉其要在詳擇而固交之其於高爵猶階而
升堂况其細者耶瑄所著有嶺南異物志

史南曰臣讀韓昌黎集乃見何堅孟瑄之賢夫
愈以孤忠直節登衡嶽而開雲峯浮沅湘而詠
石鼓二子乃能樞衣從之以就正焉可不謂同
心之言其臭如蘭矣乎贊曰昌黎名儒南嶽開
雲諸子從之薰其德茶何堅孟瑄獲其贈文珠
璣璀璨鏗然有聞

劉棗疆

沈正字

李正字

劉棗疆襄陽人或傳其名為言唐時曾辟為棗疆令
故以邑呼善為詩美麗恢贍與李賀齊名王武俊
鎮冀州敬重之辟為從事辭不應嘗觀武俊射鴨

于蒲稗間一發壘中武俊曰俊之伎先生之詞可
謂文武之會矣何賦一詩言即於馬上賦射鴨歌
武俊喜甚表授棗疆令固辭不受隴西公夷簡卽
度漢南復聘爲賓卒于襄陽郡人劉永高述其事
以告裴日休日休爲撰墓碑

沈正字衡山人不知其名唐時兄弟三人聯登高第
澧浦李群玉贈之詩云春月三改令花枝成綠陰
年光東流水浩蕩傷羈心酌桂烟嶼晚鳩鳴江草
深良圖一忽萬恨空相尋上國刈翹楚才微耳
陸沉衡嶽三麒麟各振黃金音卿雲被文采芳價

傾詞林夫子芸閣英養鱗湘水潯晴莎踏蘭菊隱
几當青岑明月洞庭上悠揚掛離襟停盃一搥筆
聊寄生芻吟又有李正字者名礎韓昌黎贈之詩
云長沙入楚深洞庭值秋晚人隨鴻雁少江共兼
葭遠歷歷予所經悠悠子當返孤游懷耿介旅宿
夢婉婉風土稍殊音魚蝦日異飯親交俱在此誰
與共息偃

史南曰臣攷諸皮日休集乃見劉棗疆碑及李
群玉集有送沈正字詩昌黎集又有送李正字
者夫杞宋無徵孔子惜之而况楚至于唐文獻

大備使逸賢無傳高士罔誅楚之不文亦至是
乎贊曰日休隱書乃著棗疆射鴨揮毫金聲琳
琅群玉詩筒正字有光芸閣蘭臺猶有餘香

劉虬

閩會
劉昌嗣

屈隱之

段洪古

劉虬字復愚長沙人唐懿宗咸通間進士及第為左
拾遺帝欲調令狐澹為虬同官虬言澹無家法布
衣竊卿相權寵其父緬訴之貶虬為山陽令寓居
潼川垂老瘞文為塚于南山刻石銘曰文乎文乎
其有神乎山水為真利其子孫乎

閩會武陵人涼州牧張茂專隴右築靈鈞臺邊人苦

之會扣門諫止人皆德之

屈隱之祁陽人初舉茂才通判廣州兼司馬事後轉
韶州刺史居官清慎郡人思之

段洪古安鄉人剛峭寡合不事產業或與交之度非
義輒去後卒于桂陽柳宗元志其墓

劉昌嗣湘鄉人後漢隱帝時為磁相二州刺史帝遇
害昌嗣憤之即避地衡山馬殷招以賓禮不赴周
行逢逼為掾昌嗣曰吾嘗致身漢氏縱不能為夷
齊獨不可效梅福乎乃改姓范號愚叟躬耕終身
史南曰夫逸俗之士多奇氣泛駕之驥多神駒

劉虬之瘞文塚閻會之諫築基屈隱之之復郡
廉慎段洪古之持身剛峭劉昌嗣之不應辟召
皆苦節不可貞者也贊曰虬瘞文塚勒銘潼川
會諫築基留滯邊關洪古方峻宗元有編昌嗣
避地愚叟猶傳

史青

史萇

胡魯

陳光問

史青零陵人唐天寶間上疏自薦召試集賢院稱旨
特命錄之

史萇道州人善屬文吳王恪辟為判官謂曰國難未
殄君若惠顧黎民不孤所望矣遂起應之

閻武陵人博學善屬辭嘗撰沅志精覈可紀唐章
懷太子為郡國志多采其說

胡魯邵陽人長於才幹後晉天福間應舉不第高駢
鎮四川乃置門下時南詔叛乘傳入川辭旨不遜
者慕容各撰書答之魯云四方之於中國猶眾星
之拱北辰百川之趨東海天地尚不能違况於人
乎駢盛稱之凡箋奏皆出其手撰安定集十二卷
詠史詩百首

陳光問長沙人讀書靈岩山中年近六袞忽有雙鶴
鳴舞其友沈彬曰必登雲兆也果同曹松登第為

五老榜時有兼德元者永州人中制科首選見荆
茂狀元樓記

史南曰學之為道大矣自周以後漢以孝廉舉
士多尚行而不尚言唐以文藝招故士多尚
言而不尚行乃若史青之修詞史莢之應辟黃
閔之撰志胡曾之詠史亦可嘉矣而陳光問董
德元之志于自售亦藝焉而已爾贊曰史青史
莢其詞有無黃閔撰志德鄰不孤胡曾詠語史
亦可書光問德元名盛識疎

孫何

孫僅 王世則 吳必達 樂雷發

王容 李大同

畢斬 楊起萃

孫何字漢公其先汝陽人徙居荆門祖鑑唐末秦宗
權據州強以賓佐起之鑑偽疾不應以講授為業
父庸字鼎臣顯德中獻贊聖策九篇命中書試補
開封兵曹掾改左贊善大夫歷殿中丞知龍州卒
何生十歲識音韻十五能屬文篤學嗜古為文必
本經義在貢籍中甚有聲與丁謂齊名時號為孫
丁王禹偁尤推重之嘗作兩晉名臣贊宋詩二十
篇春秋意尊儒教儀聞於時淳化三年舉進士開
封禮部俱首薦及第連得甲科解褐將作監丞通
判陳州召入直史館賜緋遷秘書丞京西轉運副

使歷右正言改右司諫真宗初何獻五議其一請
擇儒臣有方畧者統兵其二請世祿之家肄業太
學寒雋之士州郡推薦而禁投贄自嫌者其三請
復制舉其四請行鄉飲酒禮其五請以能授官勿
用恩遷例上覽而善之咸平二年舉入閣故事何
次當待制獻疏曰六卿分職邦家之大柄也有吏
部辨考績而育人材有兵部簡車徒而治戎備有
戶部正叛圖而阜貨財有刑部謹紀律而誅暴強
有禮部祀神祇而選賢俊有工部繕宮室而修隄
防六職舉而天下之事備矣故周之會府漢之尚

書立庶政之根本提百司之綱紀令僕率其屬丞
郎分其行二十四司粲焉星拱郎中員外判其曹
主事令史承其事四海九州之大若網在綱盛時
亦不聞別分利權勑使額而軍湏取足及玄宗侈
心既萌召發既廣租調不充於是蕭景楊剔始以
地官判度支而宇文融爲租調地稅使始開利之
臣攘臂於其間矣於是叛亂相仍經費不充迫於
軍期切於國計用救當時之急卒以權宜裁之五
代短促魯莫是思今國家三聖相承五兵不試太
平之業垂統立制在此時也所宜三部使額還之

六卿慎擇戶部尚書一人專掌鹽鐵使事俾金郎中負外郎判之又擇本行侍郎二人分掌度支戶部使事各以本曹郎中員外郎分判之則三使泊判官雖省猶不省也仍命左右司郎中員外總知帳目分勾稽違職守有常規程既定則進無掎克之慮退有詳練之名周官唐式可以復矣茲事非艱在陛下嗣位以來訓師擇將可至多以高祖之大度兼蕭王之赤心神武冠於百王精兵倍於前代分閩伏鉞者當以身先士卒爲心賊遺君父爲恥而列城相望堅壁自全手握強兵坐違成筭遂使腥羶得計蛇豕肆行焚劫我郡縣係累我黎庶陛下攄人神之忿怒憫河朔之生靈爰御六師親幸澶魏天聲一振敵騎四迎雖鎮定道路已通而德棣烽塵未息此殆將帥或未得人邊奏或有壅閼鄰境不相救援糗糧湏俟轉輸之所致也將帥或恃勇無謀或忌功玩寇但全城堡不卹人民邊奏護塞之臣固祿守位城池焚劫不以實聞老幼殺傷託言他盜緣邊州縣城壘參錯如輔車唇齒之相依若頤目手足之相衛託稱兵少不出或待奏可乃行敵騎往還疾騎鳥逝羸糧景從萬兩方

行迨夫我來寇已遁去數者當今急務擇將帥則莫若文武之內參用謀臣防壅閑則莫若凡奏邊防陛見遷問合救援則莫若督以軍令聽其便宜運糗糧則莫若輕齎疾驅角彼趨捷今大駕既駐鄴下契丹終不敢萌心南牧所慮荐食者惟東北無備之城繕完周防不可不慎蜂蠱有毒豺狼無厭今契丹西畏大兵北無歸路獸窮則搏物不可輕除孽尚或稽誅奔突亦宜預備大河津濟在處有之量屯禁兵扼其要害則請和之使不日可待真宗覽而嘉之及傳潛逗撓無功何又請斬潛以

狗俄權戶部判官出為京東轉運副使又獻疏擇州縣守宰省三司冗員遴選庶官增秩益奉未幾徙轉兩浙轉運使加起居舍人景德初代還判太常禮院俄與晁迥陳堯咨並知制詔賜金紫掌三班院撫何以被疾勉強親職一日奏事上前墜奏牘於地俯而取之復墜笏有司劾之何請西京養疾上不許第賜告遣醫診視醫勉其然艾何荅曰死生有命卒不聽是冬卒年四十四上在澶淵聞之憫惜錄其子言為大理評事何樂名教勤接士類後進之有詞藝者必為稱揚然性卜急不能容

物在浙右專務峻刻州郡病焉好學著駿史通十
餘篇有集四十卷弟僅

孫僅字鄰幾少勤學與何俱有名于時咸平先年進
士甲科兄弟連冠貢籍時人榮之解褐舒州團練
推官會詔舉賢良方正之士趙安仁以僅名聞策
入第四等擢光祿寺丞直集賢院俄知浚儀縣景
德初拜太子中允開封府推官賜緋北邊請盟遣
使交聘僅首為國母生辰使改本府判官遷右正
言制誥賜金紫同知審官院是冬永興孫全照求
代真宗思擇循良任之御書邊肅泊僅二名示宰

相或言僅嘗倅京府語民政乃命和永興軍府僅
純厚長者為政頗寬嘗詔戒焉至祥符元年加比
部員外郎代還之審刑院頃之拜右諫議大夫出
知河中府歸朝復領審刑院又次進給事中天禧
元年正月卒年四十九錄其子大理評事和為衛
尉寺丞僅性端慤中立無競篤於儒學士大夫推
其履尚有集五十卷僅弟侑亦登進士第至殿中
丞

王世則長沙人宋太平興國二年進士第一雍熙初
為右正言與左正言尹黃裳馮拯伏閣請立元僖

老後內編前 卷四十一
五
為儲嗣太宗怒黜世則知蒙州至道二年為永州太守

王容湘鄉人宋孝宗淳熙十四年進士第一時省元湯璠殿其後容累官禮部侍郎贈銀青光祿大夫登第時有詩云天上催班曉色晴五星伏盡極星明奎章讀罷三千字臚昌傳來第一聲名實兩言雖朴語始終一節悉真誠聖息深厚難圖報願罄愚衷異此生

畢漸潛江人紹聖元年進士第一時省元劉範同登漸歷官膳部員外郎知荆南鄉人以其典郡榮之
吳必達道州人宋時進士第一
樂雷發寧遠人宋理宗寶祐元年進士第一
李大同嘉魚人宋度宗咸淳戊辰進士第一授國子

學錄

楊起萃通城人宋理宗寶祐戊辰進士第二人

史南曰楚士在宋若倫魁宋元獻公兄弟暨馮文簡公鄭毅夫皆天挺英特人望允孚乃孫何兄弟聯登倫魁攷之宋史本傳及宋文鑑有論賦碑解諸篇僅詩一章永志載王世則荆志亦載王容詩而畢漸樂雷發李大同吳必達楊起

萃則寂寥無聞也豈當渡江航海時耶贊曰大
廷甲第寔謂倫魁下乎士望上應星台太上立
德其次掄才群英寥落謂之何哉

連舜賓

連庶

連萬夫

王以寧

附

連舜賓字輔之祖光裕為應山令遂自閩徙家于應
山後為磁郢二州刺史舜賓少習毛詩悉散家貲
周卹鄉閭教其二子庶庠曰此吾貲也嘗有盜牛
者官捕之急其人即以牛歸舜賓厚遺以遣之有
弟在雲夢往省之得疾而卒邑人爭哭為之罷市
子四人庶庠膺庸庶庠俱登進士庠為宜城令

都官郎中歐陽修表舜賓墓曰連君以一布衣終
而應山之人至今思之其長老教其子弟所以孝
友恭謹禮讓而溫仁必以君為法其矜寡孤獨凶
荒饑饉之人皆曰君亡無所依嗚呼君非有政令
恩威而能使其人如此其行之以躬不言而信者
與

連庶字居錫舉進士調商水尉壽春令興學尊禮秀
民以勸其俗開頻淮田千頃縣大治淮南王舊壘
在山間會大水州守議取其甃為縣城庶曰弓矢
舞衣傳百世藏王府非為死可用蓋以古之物得

於今尚有典刑也後以母老乞監陳州稅嘗送客
出北門見日西風塵如冠蓋憧憧不已慨然有感
即日求分司歸父之翰林學士歐陽脩龍圖閣直
學士祖無擇言庶文學行義宜在臺閣起知崑山
縣辭不行累遷職方員外郎卒庶始與弟庠在鄉
里時宋郊兄弟歐陽修皆依之及二宋貴退居守
道非其人不交非其義秋毫不可污也宋郊之孫
義年為應山令緣邑人之意作堂於法興僧舍繪
二宋及庶庠之像祠事之庠亦登科敏於政事號
良吏終部官郎中

連萬夫德安人或曰南湖弟也補將仕郎建炎四年
群寇犯應山萬夫率邑人數千保山砦賊不能犯
寇浪子者以兵至圍之三日卒破之賊知萬夫勇
敢謀欲留為用萬夫怒厲聲罵賊為所害贈右承
務郎時有謝淳者字景祥瀏陽人建炎間孟彥卿
通判潭州遇寇杜彥叛害彥卿淳率衆兵為先鋒
被害贈龍圖閣成忠郎仍官其子晞古朱熹祠之
史南曰臣嘗過應山訪諸連之墟慨然躊躇者
久之及攷諸宋史乃見庶及萬夫事則又驚嘆
其多才既而閱文忠集及常德志乃知萬夫及

淳之忠義所繇來者遠矣贊曰諸連清介史策
所稱舜賓磁郢居錫壽春萬夫扞寇謝淳起兵
國史大書足為世箴

任獻夫

譚申

任獻夫字安世蒲圻人登宋徽宗政和八年嘉王榜
進士及第為人溫厚醇雅峻峻若不能言而中抱
淵實立志甚遠大為文冲澹平易不求異於衆而
理致精密人自不能及娶南嘉李宗儀季女終其
身夫婦相敬如賓有龐德公之風仕歷荆門刑曹
著有異績民懷其惠

譚申長沙人政和間進士張昌邦潛辟為屯田郎中
不拜紹興四年知筠州禱旱於郊大雨數十里歲
饑民不能輸申請罷徵監司督益急坐降秩後致
仕歸民感其仁立祠祀之號曰古譚

史南曰任獻夫譚申俱以徽宗時甲科別歷州
郡至今任為蒲圻著姓譚為茶陵望族未必無
所本云贊曰任繫于蒲譚繫于茶江湘遙望均
為世家獻夫擢第固為可嘉古譚立祠繫嗜好
嗟

丁公膺

丁仁

丁必稱

丁公膺醴陵人其先有丁雋者習春秋熟于三傳時人稱之登第十七人義聚三百口家無間言宋祥符間詔表其門公膺在高宗紹興初為高郵尉拒金兵力戰死之朝廷嘉其忠節官其子倚為衡山令靖康間公億與兄公萬避難於鄉賊得公萬縛之將就炮烙公億號呼願以身代賊義舍之闔族獲全嗣是有丁仁

丁仁擢進士第參謀淮蜀制募及高沙之變仁諭以順逆降之知無為軍依城築堰郡人感德名曰丁公堰繼解合肥之圍進知太平軍湖北漕運

居二十年卒年八十四厥後有丁應奎者元寶祐間發解第一歷官至禮部尚書

丁必穰字季言蘄州人知臨江軍江西和置例以稅產均敷無稅者以物力穰因積郡帑之贏輸後改提刑于潼川

史南曰諸丁文獻無徵徒取諸郡志訛以傳信予罪惡乎辭贊曰公膺死難抗不何奪公億公萬不辱于賊丁仁築堤民被其澤必穰均輸終

秉蜀節

鄭平

蔣滄

蔣復

附

鄭平衡陽人個儻有大志宋真宗天禧三年登進士
甲科初授郴州軍事推官監潭州茶場坐免久之
召試秘書省校書郎出知連州陽山縣有善政復
補道州推官以內艱調永州判官監衡州艾源銀
冶伯兄本與弟革皆舉進士子六人及卒之日歐
陽修作誌曰自信者不疑知命者不惑故得失不
累其心喜愠不見其色鄭君學幾於此可謂君子
已矣

蔣漳零陵人少游太學歸聞黃山谷寓宜州病革漳
往視之山谷托以後事卒為具舟送棺及鄒浩謫
韶州漳又厚待之嗣是有蔣復者受學于張南軒
所著有澹巖文稿又有蔣昺者字彥忠嘗隨南軒
至天慶觀誦宋真宗御製碑文一覽無遺時黃彪
嚴昌裔皆名士也善與之交至忘年焉厥後有蔣
雍者郢中人范致虛薦之

史南曰善無微而弗錄錄之懼遺善也名沒世
而可稱稱之懼失名也然而名在人善在我名
必稽實善必微行君子是以有取焉爾乃若平
之見稱于永叔漳之見孚于魯直復昺之受學
于敬夫雍之蒙薦于致虛胡可以弗錄乎哉贊

曰士膺一命當守三箴達不離道政在養民平
之自信漳之知人復曷暨雍齊賢有徵

周堯卿

周堯卿字子俞道州永明人警悟強記以學行名天
聖二年進士歷連衡二州司理叅軍桂州司錄知
高安寧化二縣提點刑獄揚統入其境見被刑而
耘苗者詢之對曰令不我欺卒無怨言統遂嘆而
薦之後通判饒州累官太常博士范仲淹復薦之
始堯卿年十二喪父憂戚見母則匿其情及母喪
倚廬枕塊慈烏啣土成隴人以為孝感為學不專

於注疏尤長於毛詩左氏春秋及讀孟莊之書則
曰孟善言性周善言理天何言哉所著有詩春秋
說各三十卷文集二十卷子七人諭鼎州司理叅
軍說湖州歸安王簿謚諷諷說誼皆知名事見宋
史

周世南祁陽人幼學游上庠初聘董氏女素婚而瞽
或議改娶世南順受既登第猶不改其初累官駕
部郎中至少卿

周式湘陰人有行義為嶽麓書院山長祥符八年召
見輪對拜國子主簿歸而教授鄉里張南軒撰文

紀之

史南曰臣攷宋史見周堯卿繫于儒林傳豈其
間濂溪之風而與起者耶而世南之納聲婦式
之迪鄉士皆可紀也贊曰周起營道派衍春陵
堯卿好學世南聖盟式游嶽麓士林有聲

廖倚 李公佐

廖倚衡山人宋進士爾之弟也歐陽修贈之文曰元
氣之融結為山川之秀麗在衡湘其蒸為雲霓其
生為杞梓人居其間得之為俊傑秀才廖倚生於
衡山之陽而秀麗之精英者得之尤多故其文則

雲霓其材則杞梓始以進士舉於有司不中遂遊
公卿間所至皆虛館設席爭以禮下之今永興大
原公稚識沉正器君深其初鎮秦川也請與俱行
遂趨函關以覽秦都則西方士君子得以承望乎
風采矣凡居秦幾歲而東將過京師以歸予嘗以
上計吏客中都識君於文達辱之以益友當君之
西也獲餞於國門及夫斯來又相見於洛嶺語故
舊數日乃行夫山川固能產異物而不能蓄之者
誠有利其用者爾今君之行也余疑夫不能又蓄
於衡山之阿也况爾著洪範封建二論見崇道紀

李公佐隨州人歐陽修嘗撰東園記曰李氏世家隨
隨春秋時稱漢東大國魯桓之後楚始盛隨近在
天子千里內幾百年間未出一仕獨城南李氏為
著姓家多藏書訓子孫以學予為童子與李氏諸
兒戲其家見李氏方治東園手植美草周遭封樹
日日去來園間甚勤已而予客漢沔游京師復歸
公佐引予登亭乃見夫樹之蘗者抱草之茁者叢
茲之甲者今果矣公佐好學有行鄉里推之予益
友也先時又有李寬中創石鼓書院

史南曰衡為湘南之望隨為漢東之望山益以
峻水益以駛而倚與公佐乃能闡其靈秀永叔
又發之以文章皆可書也贊曰衡宅湘南厥嶽
祝融隨居漢東厥鎮大洪二子竒特稷有古風
誰其表之曰文忠公

鄧咸

鄧忠臣
鄧李臣

鄧淵

鄧深

鄧咸湘陰人素負巨志宋真宗天禧間郡國學宮未
廣咸創義學于邑南招延儒碩訓誨子弟湘楚之
士如江夏馮京安州鄭儼胥從之游姪珙為豐城
簿捐俸以助庫丁却其獻女皆咸教也嗣後子姓
繁衍有鄧忠臣登熙寧三年進士第初任大理丞

獻賦擢正字轉考功郎中時議范忠宣公謚忠臣
覆奏詳允會黨論起罪編元祐黨籍卒贈直秘閣
官弟孝臣杜門力學宣和間屢辟不就後有鄧淵
者登寧宗三年第初任鄜延經畧司稅宜入奏邊
務徽宗嘉其敏練改國子丞虞部員外郎大觀中
值星變淵上封事言多剗切蔡京基之左遷監酒
稅知懷州又有名深者登紹興進士為大府丞補
廣東提舉市舶汪澈薦之擢潼川路轉運使監醴
酒務疏請蠲祛虞允文貽書云不畏強禦挺然之
節贈中散大夫

陳起沅江人初為寧鄉令改秭歸疏鑿新灘歐陽修
稱之轉湘鄉革鄉令及遷黃梅有妖寇籍祐幻術
惑衆起悉衆禽之繇是知名召拜侍御史

史南曰鄧氏雜見于郡志陳子見稱于文忠若
夫闕文無徵固古史所不廢贊曰鄧咸創塾以
延俊乂允文薦剡光照來裔陳起疏江行者不
滯永叔撰文價增百倍

李受

李康年

李漢臣

李傑

李堯臣

李受字益之瀏陽人宋英宗治平中與李迪之子東
之登進士拜諫議大夫天章閣待制神宗在東宮

廉侍讀屢疏請老不允帝即位進給事中龍圖閣直學士復言在先帝時年已七十不敢竊祿自安今又加數年老憊矣惟賜歸焉加刑部侍郎致仕帝嘉其知止賜宴賦詩及序如東之請老禮時以兩疏擬二李云卒年八十贈工部尚書事在宋史李東之同傳

李揆登乾道二年鄉薦授寧遠尉獲盜數多或謂可得美選揆曰殺人以階榮顯吾不為也後遷上高令召入為中舍人

李漢臣字仲良荊州人兄元叔大史黃庭堅之姻也庭堅謫黔州漢臣懇款辛勤問疾不懈漢臣求科舉不遂乃依駙馬曹詩門以恩補郊齋郎調漢陽尉獲盜數十人或曰此可市美官君曰吾寧殺人以為利耶再調上饒尉改理定令黃庭堅銘曰嗟乎仲良其才可以頡頑於世其義可以長雄於鄉信矣

李傑邵陽人熙寧初登進士出帥湖南捐俸置書籍以貽邵庠置祭田以贍宗族鄉人稱之

李堯言熙寧中除侍御史未七十即解綬其兄立言自潭州歸老又有李竦亦納履同時里居鄉人語

云元豐濟濟稱三李一瓢樂在其中矣

李康年江夏人父昌國善與人交黃山谷與之游兄
康侯仕至河陽太守康年仕至國子監丞弟康直
仕至左司員外郎

李長庚寧遠人徙居江華紹興中登進士歷仕五十
廣潔有守不事生業惟藏書數千卷顏其亭曰冰
壺卒年八十六有冰壺集官至朝請大夫

李譽字崇道桂陽州人紹熙中登進士又李椿衡陽
人仕宋為御史大夫卒贈文肅

史南曰臣於諸李蓋無足徵郡志者國史之權
輿國史者天下後世之公是公非胥繫焉攷諸
各志乃知李受之辭秩李揆之居卑李漢臣之
受知于山谷其他若傑與譽與長庚蓋無足徵
也而堯言三人之勇退康年三仲之並美可嘉
已贊曰李受天章晉階龍圖李揆鄉薦言亦有
孚燾之守鼎厥志不誣漢臣連姻山谷之徒堯
言葆光康年服休長庚諸書傑譽弼謨

廖視

廖視字德遠端明學士明畧之裔也宋寧宗時初任
司理參軍歷秩房陵縣令轉朝奉郎通判衡州事

狀元許涇經畧湖南舉視于朝薦劾有曰視器質
端方克守家法嘗任理掾以直去官兩為劇縣治
狀稱最衡陽二郡備著賢勞承攝道永二州首尾
年餘剔除奸弊愛惜財賦一毫不以妄用代者賴
之宋名臣奏議載涇舉視狀又云近蒙朝廷差知
房陵然其才術操行宜在激濁揚清之地後家衡
州族甚蕃衍有紹昇者為郡守而角通岩先俱官
國史云

史南曰臣以嘉靖乙酉于役千岷道出衡陽訪
諸宗派乃獲世綵堂舊譜及改名臣奏議又見
許涇薦劾有足徵也贊曰德遠儁才明略之胃
兩邑績殊三州澤茂薦劾彌光孰出其右子孫
繩繩克昌厥後

袁申儒

袁申儒龍陽人宋紹熙二年進士歷官武陵郡守丕
創學宮及貢士莊以贍多士申儒撰記畧曰精神
內固則文有定見志氣外鬯則文有定力苟清明
者汨昭徹者蔽內不先固則定見亂矣澡守者謬
蘊蓄者餒外不復壅則力移矣成周取士自鄉校
黨庠升之天子之學宴飲以樂之詠歌以鼓之以

稍聚待賓客以旬聚待羈旅非徒以其文而已蓋
不如是則精神抑厭志氣消索渠能極言肆論干
冕旒前乎常德古黔中地固不可以文言也而層
巔絕崖野谿廢丘有蘭其馨有芷其芳足以繼風
雅育多士申儒既守郡又承之憲司月征歲歛不
以供日膳而以供貢士保其天和存其正性從容
整暇以應上求則精神內固志氣外溢是亦觀願
之義也又建楚望亭及臨睨仰上二亭于德山善
卷壇之麓自為文記之其善政流風固可想矣
史南曰臣攷陳高吾撰常德志列申儒于名宦

徐觀其楚望三亭及貢士莊記乃嘆其人品學
術不易得也贊曰惟彼美人牧鄉閭兮創田養
士文璀璨兮臨亭揮毫藻爛熳兮德山善壇寶
光煥兮

馮子振

李士瞻
王榮忠

晉元理
金希說

李崇道
劉永悅

歐道
趙錫

馮子振寧鄉人仕元為集賢待制宣撫使陳孚極敬

畏之子振為文酒酣耳熱命傳二三人潤筆以俟

據紙疾書隨其多寡頃刻輒盡專料醲醕美如蔗

錦律之法度未免乖刺人亦以此少之

李士瞻字彥夫其先沙洋人後徙荊州登河南行省
進士歷戶部侍郎陞遼陽二省左丞當在閩時適
海寇據福州城士瞻諭以禍福自降閩人立祠祀
之後至光祿大夫翰林承旨學士
晉元理其先高昌人官江南因家公安元至正壬辰
進士任御史僉江南湖北廉訪司事時郡縣皆入
於寇遂詣湘憲假分司印徵兵屬郡未幾授嶺南
叅知政事兵潰一門死者過半而元理終不屈自
號安節先生

李崇德字象賢醴陵人世以儒名家元成宗大德間
辟湖南憲府史時宣尉使乃阿里海牙之子誣廉
訪李棟強質民田崇德白其枉學士虞集壯其節
為立傳曰世之畏威顯誣異懦不自立者觀象賢
亦可以少自勗哉

歐道字性之寧鄉人初隱居泉溪石山讀書避兵元
阿里海牙至潭州欲屠城道即仗策入軍門勸勿
殺人以干天和海牙解之辟荊州行樞密院掌書
記轉中書令史

趙錫衡州人知吉水縣簡靜慈祥民稱為趙佛子賴
寇揚聲屠廬陵民欲逃去錫携酒飲山亭民始安

樞府調兵誅討邑當衝要吏請稱貨以應錫不聽
如是數四吏懼不知所為及統師至即其文移為
畫方畧帥大喜呼酒握手相勸曰此去州見四十
里無得更擾汝民民德之既丁艱歸道茶陵值寇
被執有識者驚曰此佛子也還所掠送之出境

王榮忠岳州人元至正間同知時盜賊日起掠興國
陷會昌榮忠與賊戰數十合禽三百有奇克復縣
治坐劄零都相形勢以建宇募義兵以禦賊創鍾
樓以警晨昏賊復集五千餘人攻零都榮忠身先
士卒矢石交下破賊幾千餘人收公私銅鐵鎔

液澆注賊由是潰走

趙淇字元德其先臨淄人徙家衡山年七歲以父蔭
補承奉郎明年中童子選舉累官右文殿修撰刑
部侍郎至元十五年起為湖南宣慰使盧處道銘
其墓曰爰諏爰謀斯著蔡只爰構大厦斯棟載只
金希說襄陽人仕元為御史與弟希舜齊名又景厚
字德載漢陽人領鄉薦許有士師之又劉永悅長
沙人號雪峯仕元為御史又陳元字伯元至正間
進士為道州錄事參軍

趙吉甫其先蜀人徙居沔陽與許衡友善衡嘗稱曰

吉甫天資高於衡遠矣又姜天麟舉進士官翰林
檢討又樊簡甫安仁人兄弟連中三科又黃溥字
彥博蒲圻人至元間鄉薦授鄧山書院山長

史南曰元入中國以夷統華而楚邦人士仕之
者僅數十輩而已其功業聞望可以超軼絕塵
者蓋亦鮮矣贊曰龍戰于野其血玄黃載鬼一
車後脫先張彼美群士組紱輝煌未知決擇孰
為龍光

楚紀卷之四十一

楚紀卷之四十二

皇明賜進士 經筵日講同修 國史奉直大夫前翰林院侍講學士臣廖道南謹撰

考履內紀後篇

方必壽 周舟

方必壽巴陵人洪武乙丑進士初知宛平縣政績茂
彰擢北平知府歷陞陝西按察使操履堅確赫然
有聲厥後庭玉克紹厥緒永樂丙申進士仕至浙
江布政使裔孫鈍字仲敏正德辛巳進士授知華
亭縣守制起復改內黃縣清苦練達召入為監察
御史巡視山東舉劾方面不避恩讐事竣督理大

工擢大理寺丞

周舟益陽人洪武中以人才薦授知句容縣永樂紀元天下各府州庶官朝見

上夢金水橋大舟載小舟詰朝閱吏部郡臣姓名以為符應即擢大理卿克稱厥職

史南曰尹翁歸以治郡高第入為右扶風田千秋以一言悟主遂封富民侯夫士之遇與不遇

惟其時焉爾乃若方必壽令宛平而采諸物望周舟令句容而形諸夢應其時之所遇視翁歸

千秋何如哉贊曰北部燕薊宛平觀光南都吳會句容

帝鄉方令起北奮庸用章周令起南緝熙思光考其

幽履終焉允臧

梁德遠

陳順成	劉必聰	張從道	陶鑄	周謨	徐子高	劉從政
賀守貞	唐貞	張啓	盧文政	戴本	李守中	陳文宗
彭友信	甘鏞	周鏞	陳文	周幹	康慶	楊華
蕭忠	宋忠	周敏	周文	周文	蕭忠	宋忠

梁德遠邵陽人洪武乙丑進士父廷用任戶部郎中

逮繫詔獄德遠中甲科不赴瓊林宴及父謫戍上言請以身代

高皇帝憫其孝行特拜工科給事中命釋其父

陳順成攸縣人洪武乙丑進士拜監察御史毅然以

天下為己任憲度貞肅百寮多憚之

賀守貞攸縣人洪武辛未解元甲戌進士拜監察御

史糾正貪墨克勵官箴

唐貞夷陵人洪武中以鄉薦拜給事中耿介敢言求

樂間益勵厥志丕振直聲卒于官時

仁宗在儲宮製文誅之教諭吳弘道跋其末簡云君

臣義重應難寘生死情深自不忘識者悲之

盧文政江夏人幼嗜學溫雅有度洪武己卯領鄉薦

拜吏部主事累官太僕丞致仕年八十餘手不釋

卷所著有歷代一覽

劉必聰沅陵人洪武丁卯領鄉薦嘗留題于郵亭云

為國時垂淚觀天或自舒原非漢諸葛三顧定何

如部使者薦諸朝拜山西道監察御史振揚風紀

所至肅然

陳讓穀城人洪武甲子領鄉薦授刑部主事讞獄明

允改監察御史銓司以品級相拘為言

上命擢之

張啓善化人洪武丙子鄉薦入胃監選授吏部主事

轉郎中操履清慎歷官浙江布政使

傅霖湘陰人洪武中領鄉薦拜監察御史督察戎務
茂著能名

張從道京山人洪武中鄉舉授廬州府通判勤能有
聲永樂初擢徽州知府盡心民事有古循吏風後
調永平府政聲益著

戴本澧州人洪武中貢入胄監拜兵科給事中出補
廣西叅議茂彰政績

李守中寧鄉人洪武中貢入胄監拜工科給事中出
補廣東叅議民懷其惠

陳文宗字景周崇陽人洪武中貢入胄監拜吏科給
事中出補江西僉事風采肅然

陶鑄通山人洪武中貢入胄監

高皇帝微行至鷄鳴山聞書聲誦之鑄云日食廩餼
無以酬功即拜北平布政使

彭友信攸縣人洪武初貢入胄監

高皇帝微行至竹橋因指虹為題

御製云誰把青紅線兩條和雲和雨繫天腰友信應
聲云玉皇昨夜鑾輿出萬里長虹駕玉橋次日早

朝

上閣故具以實對即拜北平布政使

甘鏞字以聲湘陰人洪武己卯以明經薦授訓導除
休寧丞有政聲拜廣東道監察御史

周敏字好學馮陽人洪武中任浙江按察司副使性
明敏遇事立斷鞫訊獄訟洞察情偽徃無滯囚永
樂十二年以秩滿去

周謨瀏陽人洪武中以明經舉授河南左叅政問學
博洽優于吏治

周幹瀏陽人洪武中貢入胄監選授山西布政司照
磨政聲日著永樂中歷陞浙江布政司

康慶襄陽人洪武中貢拜監察御史改知縣遷知和
州坐事免復起為御史擢四川叅政

楊雄九溪衛人洪武中以貢拜監察御史鞫獄明慎
剛毅不撓

徐子高湘陰人洪武中以人才薦拜監察御史時肇
修漕河子高督察厥勞居多

陳文禮蒲圻人洪武中貢拜監察御史嘗鞫疑獄夢
有孚焉果得殺人者寘諸重典名遂日振

蕭忠岳州人洪武中貢入胄監歷官山東布政使左
遷高密典史永樂初復任江西僉事調廣西

宋忠崇陽人洪武中貢知清流調仁化先是群盜嘯聚山洞忠挺身抵賊巢推誠撫綏賊乃出降擢員外郎以清流耆民保留陞汀州知府

劉從政字恭民黃州人洪武中拜監察御史審諤彈劾歷官河南山西叅議綽著能聲卒于官

史南曰夫變通不滯者時也持守有貞者道也時變而道不變君子亦論其常爾

皇祖履飛龍之運乘虎變之期寤寐英雄登延巖壑

凡栖遲于黌校藏修于里閭者咸歛而升之

大廷列之庶采若梁德遠唐貞諸人起為諫議劉必

聰陳讓諸人起為柱史其他周旋即署駁歷藩

臬彬彬盛矣豈非講時良會然哉贊曰天降時

雨山川出雲

聖作御極哲賢彙征濟濟多士萬邦惟寧何以徵之

史有餘馨

廖思敬

杜文德宗

吳山方嵩

廖思敬衡州人洪武間以明經任直隸常州府教授

與修性理大全纂輯諸家註釋頒行天下學校

杜文德衡州人洪武二年以明經舉任府學訓導知

府高從訓建理黌官開拓基址文德謀畫居多士

慕其德塑像鄉賢祠祀之

吳山黃州人洪武初舉明經授合州教諭循循善教擢內江知縣廉聲茂者尋以憂去改知青神至石首卒山博學多聞尤精于春秋鄒來學輩皆出其門

方嵩咸寧人受學於勝國解元胡可仕業春秋之學洪武庚午中經魁兩任教諭遷邵武學教授典試浙江得楊復江西得陳循各置第一人服其藻鑑以子洙貴封監察御史

鮑琮咸寧人洪武庚午鄉薦歷任台州瑞州吉安三

學教授所至以身率人不在言語文字間永樂間楊文貞公稱其善誘學者咸知自勵賓興多琮門下士居顯宦者尤衆後年老徙居安福

史南贇曰虞庠九德姬離六藝虎闢齒胃暨澤延又思敬陳藝文德昭緯吳山授經方鮑典試允矣諸君擊蒙拔萃

鄧槐

鄧槐字大材蒲圻人洪武庚辰進士性資端慎循循守禮與人交未嘗有倦色初授成都新繁知縣時蜀土自明玉珍竊據後百務廢弛民無聊生槐蒞

政慨然思紹衛常王孟之績創規制設條教修水利懇荒田民多賴之再任新津政聲益著四川志又謂新繁有清白江槐以此自勵故終身清白以琴鶴為侶

史南贇云美哉大材肇薦甲科視篆二邑民奠以和清白之江輿人謳歌媲美清獻績載岷嶓

李寧 辜臯

李寧字景安麻城人洪武初知餘干州才識英發盜群肆掠寧率鄉兵協同官軍擒其渠魁復以土兵邏散其黨數百人歲饑移粟賑民民懷其惠作遺

愛文

辜臯江夏人洪武初知饒州德安縣宣布號令招撫流亡會寇發聚民兵保障時聞礦權銅為民患奏請罷之乃修學校建橋梁拓葦蕪鷄犬相聞遂為樂土

史南贇曰龔遂渤海帶牛佩犢虞詡朝歌滅竈易服李寧希遂驅盜空谷辜臯効詡民獲其欲

李懋

廖時雨 陳佑文

楊敬 程瑞

黃安秦

易成

李懋蒲圻人洪武初知新昌州創州治建譙樓學校橋梁百廢具興諭俗條規以敬父母厚人倫訓子

弟務農桑崇學校息訟爭禁賻博慎廉恥為先務
皆切實可行

廖時雨黔陽人洪武乙丑進士授山陽縣丞簡重自
守平易為政澹然無欲即掛冠歸

楊敬麻城人洪武初知富陽縣創置廳宇建學校寬
猛得宣民懷其惠

黃安泰蘄州人洪武元年知彭澤縣會兵燹後隕艱
跋涉以身勞國廉勤為政

易成瀏陽人博涉經史善屬文洪武間領鄉薦歷官
廣東肇慶知府民畏而愛之

陳佑文湘潭人洪武初為泰安州同知尋陞知州公
勤廉慎蒞政有為遷湖州知府民甚德之

程瑞漢陽人洪武初知南豐州為政廉謹不以一私
自黷侵晨治事日晏方罷隨事剖決庭無留詞

史南贇曰天造草昧雲雷經綸體國經野敬天
勤民李懋諭俗時雨含貞楊敬盤錯易程章明
安泰佑文所在有聲

陳堅但元行 江恕

陳堅臨湘人洪武中知長樂縣時兵燹黎民阻饑堅
請賑之賴全活者衆復奏立守禦千戶所創築城

池

但元行今鍾祥人洪武初知武寧縣開荒田興水利建公署民至今賴之

江恕漢陽人洪武中知福清縣調崇明善決斷民不敢欺未樂秩滿陞刑部主事士庶挽留特命擢蘓州府通判仕至台州知府

何燭字仲明蒲圻人槐孫之子也學有原委慎默自檢篤行彰聞

國初甲辰授休寧縣簿時戎務倥偬徵賦督迫燭區畫有方民賴休養暨董木植築城垣雖祁寒暑雨

不憚勤苦三載考績復職後坐事註誤民思慕之洪武十七年復以明經薦知雲南之鎮南州卒于官

史南贇曰炎海混洋八閩環馬婺山聳秀兩浙繇焉陳堅江恕海之瀛曠元行仲明江之淞川君子考履察其所安

夏則中

楊節

楊浩

陳汝楫

夏則中武昌人洪武中知興寧縣值周寇亂又官兵壓境洶洶弗靖則中率耆老訴於征南將軍纔免橫酷招攜流亡既集病官田稅重莫肯承籍則中

請以官田減同民產定賦分給耕業歲饑發廩賑
拯凋孳復生民感其惠久而不諼

楊節樊城人洪武三十一年以經明行修薦授徐州
知州為政以厚風俗為務郡中大疫節遣醫治療
躬自督視又捐俸以給貧者且獎拔士類多所造
就任六年屬邑各上疏留之陞大理知府

楊浩江陵人洪武間以人才薦任本縣儒學訓導啓
迪有方歷陞長史廣平知府遇事敢為時有巨盜
流劫郡縣為害甚酷浩設方畧捕獲無遺境內輯
寧又興學校均賦役民立祠奉祀

陳汝楫字濟民蒲圻人博雅醇實善吟詠工草書洪
武初舉明經授徽州府通判轉監秦州茶馬司謫
知渭南政聲卓異擢知廣平府卒于官汝楫有幽
居四景及楚林諸詩

史南曰若耶父老一錢必售中牟兒童一雉罔
捕則中暨節含弘有度汝楫紹浩政靡紕繆

朱敏

張績

婁昇

李志

荆政芳

唐元

陳志

余士賢

余汝弼

楊輔

張澄

陳文質

蕭昇

陳宜

冉寧

朱敏荆門人洪武壬午鄉薦永樂間拜監察御史風

采凝重囊無贏餘嘗被抄沒惟敝衣一襲以是知其廉正卒于宮歸葬命沿途有司祭奠

張績襄陽人洪武庚午鄉薦拜監察御史有直聲尋陞廣西按察司副使公廉生成百粵肅然

婁昇湘潭人永樂癸卯鄉薦第一典教以師道自勵宣德己酉考試山西得人最多奏績廷試賢豪贊經綸詩拔居優列擢禮科給事中

李志松滋人永樂辛卯鄉薦拜山東道監察御史剛毅執法宣德間遼東朶顏衛指揮哈刺孫朝貢不至命志擊之志奏曰古者馭夷狄來不拒去不追

今朝貢雖缺遽加以兵非懷遠之道遂罷兵

荆政芳溆浦人永樂丙戌進士歷官交趾按察僉事改山東廉慎自恃不苟取與致仕歸囊中惟俸金三兩家居不入城郭澹泊自如不給饘粥未嘗悶

悔壽登八袞

吳軌江夏人永樂癸卯鄉薦授兵部主事廉勤明敏沉機先物料無遺策丁父憂用當道薦詔奪情起復轉戶部主事陞山東按察司僉事

何楚英攸縣人永樂辛卯進士拜監察御史擢陝西副使歷遷雲南布政使賜璽書褒異黔人懷之不

忍諉

鄧啟零陵人永樂戊戌進士拜監察御史沙汰冗官除興泰令在任奏蠲歲征民藉以安

成務興國州人洪武丙子鄉薦永樂間拜監察御史振揚有聲超擢貴州按察使

唐原辰溪人家貧力學篤信尚義永樂初拜監察御史史振舉憲度

陳志茶陵人永樂戊子鄉薦拜監察御史才行可稱余仕賢武陵人永樂中授順天治中有治行陞蘄州知府理繁治劇綽著政聲

余汝弼宜都人永樂辛卯鄉薦歷官屯田郎中里嘗大疫與諸兄煮湯粥往飲食之人德其惠居官儉約不改其操楊文定嘗以靜澹如義稱之

楊輔武陵人永樂丁酉鄉薦授刑部主事轉郎中讞獄公平擢雲南按察僉事遷山東按察使克振風紀

張澄武陵人永樂中鄉薦歷官河南布政司叅議閑於職務聲華茂著

陳文質武陵人永樂中授雲南安寧州同知持身廉謹和輯諸夷累陞廣東按察僉事

蕭昇字彥高黃岡人永樂丙戌進士拜福建道監察御史九載考績上疏省親

文皇帝命給道里費且賜勅以褒之中允王愷撰文贈之稱其禮以律身明以折獄皂囊曉進臺閣生風白簡夕森奸回落膽夫固有所試矣

程鑑嘉魚人祖從龍有隱德鑑克承其緒中允王愷以女妻之永樂丙戌進士歷官虞衡郎中鑑特達持重卓有定見營繕虞衡稱劇司鑑所至裕如歷大夫官所御淡素人皆推服刑部侍郎曹憲以鑑堪大任薦之適鑑奉使卒于途

陳宜字仲誼嘉魚人洪武辛卯鄉薦授桂林衛經歷贊畫戎政召為兵科給事中改工部主事轉員外郎

文皇帝營建兩京仲誼効勞居多洪熙初擢廣西叅議中允王愷撰文稱其德懋厥官凡三十年老而不倦

冉寧字士安夷陵人洪武丙子鄉薦初授大竹教諭訓士有成永樂中擢刑科給事中考績轉中城兵馬遷工部營繕主事歷陞兵部郎中中允王愷撰文稱其勤以勵已惠以臨下百工効能罔有廢事

史南贇曰不惟其官允惟其人不惟其跡當于其心朱張婁李綽著休聲荆吳何鄧懋著弘勲成唐楊蕭可用汲明四陳二余不損厥名程冉即署居身可珍

孔文英

王訥武楫

邵或唐慎

馬駿黃鍾

李光學盧坦

李思中倪永壽

卓朝用

孔文英字世傑其先陝西人徙襄陽永樂辛丑進士授知廬陵拜監察御史巡視京畿折黃岩大獄擢湖廣按察使陟大理卿督守紫荊關卒訃聞上遣官祭塋墓在峴山薛文清公銘曰君惟其魁孔

牒世揮所持不回所職不渝所積既徽所成惟丕王訥穀城人永樂甲申進士授高唐知州教民稼穡作新學校均租賦省刑罰急于救荒民賴全活秩滿父老詣闕懇留

宣廟駕經其地聞善政嘉之賜以金綺

邵或應山人永樂中貢授桂林府同知改東昌擢安慶知府德性寬宥理民事如家事時文移督責躬任其咎以事被逮民祈神請禱事白父老忻慰六載考績民挽留之至攀卧不能釋九載考績六邑耆民咸以或廉幹詣御史臺表之

馬駿字驩良蒲圻人永樂六年中鄉試銓授崖州同知倏值颶風大作海寇蜂起駿保全城池與有力焉厥孫文明文獻俱起貢為教官曾孫練舉進士任嘉定知縣擢南京戶部主事負外郎中出補河南知府

李光學武陵人永樂間貢入胄監授知直隸興化政存仁厚廳東有鵲巢二雛皆飛去其一折翼獨留光學以藥哺之亦飛去後光學病危思魚忽鵲啣一鱖置於庭光學烹食病遂愈人以為能愛物之

驗

武楫江夏人永樂甲申進士任知縣司牧有方民安如堵秩滿百姓詣留命馳驛復任

唐慎江華人永樂丁酉鄉薦拜監察御史巡視廣西有淫祠俗傳赭衣過廟者災慎服緋衣往焚其像廬其廟邪慝自息後擢按察僉事

黃鍾字景陽景陵人永樂辛卯鄉薦授崇慶知州改知山東武定州漢庶人告變鍾面奉

宣廟聖諭馳驛至州州賴以安三年卒于官

盧坦巴陵人永樂中貢授知南城縣剛果善斷庶事畢集時閩盜攻劫鄉村坦率民勦捕無遺縣境翕

然服之

李思中荆門人永樂四年知進賢縣持已公勤處事得宜陞刑部郎中

卓朝用通山人永樂間貢知寧縣公平廣恕節省科差惟恐傷民董夫役于太和山以病卒役夫哀籲倪永壽桃源人永樂辛卯領鄉薦貴州鎮寧知州性和易治郡清簡政不煩苛教民務農力本民懷其惠

史南贊曰奉天司牧敬授明時贊居宣化祗若敷施文英廷平文清撰詞訥或有典駿揖罔私

光學慎鍾醇政不疵盧李卓倪寂績咸熙

李滄

劉淵

王彥

徐良

李滄字朝宗嘉魚人宣德己酉鄉試第一

宣宗詔賜冠帶給俸入翰林讀書應制獻詩輒蒙恩賚除金谿教諭陞保寧教授六十致仕居村中客至無貴賤必具服出見兄弟同居舊宅悉遜乃闢宅傍隙地居之

劉淵字伯廣江陵人天資俊逸字法趙松雪詩效薩天錫宣德九年以明經行修

宣宗御批卷曰文理通暢宜授教職遂授雲南嵩明

州學訓導改安陸江夏歷京山教諭修舉學政聞人多出其門

徐良字明善邵陽人性敏質粹嘗輯讀易指南以啓後學尤工詩文善草書素為鄉邦重宣德中以經明行修任本縣訓導造就功多秩滿少傳楊溥薦知均州介守清澹政施仁愛興學勸士有古君子風卒于官孫永澄弘治癸丑進士

史南贊曰

宣皇宸翰日麗呈輝音編載閱彤管頻輝李滄入院劉淵親題明善測易理學管窺

劉以文

易倫

鄺彥譽

賀宗

劉以文字彥章黃州人洪熙乙巳任温州府照磨綽著廉能秩滿陞泰和知縣改陽城有美政重書贈秩命再任民樹碑彰惠歿時耆庶數十人往吊于家立祠祀之御史李經撰記

易倫益陽人少有大志宣德中拜監察御史獨立敢言忤權貴謫教宜川尚書江淵贊曰其進可取卿相而言動蹇蹇其退可式後學而模範循循識者以為知言

鄺彥譽臨武人宣德中舉賢良方正任四川布政司

老成內紀後 卷四十一
檢校正統十年遷錢塘知縣心存愷悌政尚寬平
擢浙江按察僉事

賀宗湘鄉人宣德庚戌進士授大理評事嘗疏其邑
田稅增重多被水潦民苦役輸減十之一湘民賴
之正統間浙寇葉宗叛宗畫策討之

上命同尚書石璞任蒞其事有功

史南贇曰文武莫麗多士用寧成康斤明大猷
允升世至宣德泰階以平劉易鄭賀士林之英
重熙累洽莫可得稱

盧中

劉深

張信

馮維

盧中字守正蒲圻人考貴賢訓嚴中奉命惟謹習誦
禮經正統九年中鄉試魁選明年登商輅榜進士
授刑部主事歷員外郎中居常布衣蔬食無重帛
兼味遇權璫貴戚屹然峻絕弗少遜避以故門無
私謁而用法罔撓奏績推恩及親錫以誥命蒲令
葛鳳儀令里人捧冠服謁其第厥考設具候令執
禮甚恭令去召中于庭責之曰爾胡以名器桎梏
乃翁紮仍鞭之乃已及中陟浙江叅議守父之訓
如初逮歸行李蕭然無長物里中人稱其廉朴而
貴賢之賢益彰

劉深沔陽人正統己未進士初知崇寧縣嚴厲有威
遇事果斷聽訟能得民情吏不敢欺境內肅然
張信字誠之景泰辛未進士授刑部主事員外郎陞
成都知府為人溫謹廉靜寡欲人號為青菜張所
著有夢庵集

馮維字文綱武陵人正統乙丑進士授刑部主事歷
員外郎中決獄勤慎陞廣西布政司參議轉叅政
所在以寬平致譽

史南贊曰淳厚者流簡重不誇循良之吏悃悞
無華中深太朴信維可嘉于以章之得臣無家

王應清

張瑄	賀讓	羅瑛	鄭連	黎忠
謝鑰	黃瑛	譚公望	魯子微	
沈溥	羅文袞	李慶	張連	
賀勛	周彝	歐陽復	王佐	
	孔儒			

王應清江陵人正統初貢授同知性寬厚平易持身
廉謹事少過誤擢池州知府

張瑄雲夢人正統甲子鄉薦初知義烏縣天順初考
覈庶官以張瑄第一賜宴并襲衣擢金華知府

羅琥茶陵人正統中任南陽通判捕盜白誣積粟三
十萬石撫綏流民以萬計築封丘隄八十餘里改
衢州進南京戶部郎中尚書缺署掌部事諸司咸

祇令焉

鄭達字叔通襄陽人博涉經史正統間知盩厔縣景泰五年移崑山有捕盜千戶不法殃民達纒至即糾去之注思校學存卹窮困歉歲勸貸民藉生活自奉清約圖書自娛他無所好孫傑正德辛未進士吏部文選郎中謫節州知州

黎忠字行恕江夏人正統中任建昌推官閩寇鄧茂七攻陷隣境忠選驍勇屢出奇謀克摧賊鋒撫臣楊寧上其功擢福建知府

賀讓衡山人正統中授四川知縣蝗傷田稼牒告城

隍蝗盡死有虎為害復詛捕之遇旱禱雨有應

黃瓚衡陽人正統中授四川知縣潔已勤政興學勸農廣驗地以養士豐儲蓄以牧民父老至今思之譚公望茶陵人正統間知宿松縣政嚴而利於治故輯伏姦黠作興士民有聲于時未幾疾卒人咸惜之

曹子徽字士美公安人正統三年貢入胄監授中軍都督府經歷廉介守正擢漢中知府深獲士民心聞憂歸父老赴闕留之不報周易同頌曰冰也斯清玉也斯潔月也斯白惟是豪傑入佐明哲厥邁

休烈亦可以想見其人矣

謝鑛公安人領鄉薦知宿松縣豈弟廉慎政務寬明每剖訟獄必推誠以求其情未始見疾言遽色民咸愛戴之

羅文衮寶慶人貢任安慶通判性資明遠留心於撫字日夜孜孜思所以安集百姓者由是民皆安堵鮮有逃移

李慶字積善景陵人正統九年貢授建昌同知催科甚急慶為緩期民悅之輸納恐後遷南京戶部郎中調禮部儀制補浙江鹽運使稽簿書絕請謁有持券請鹽者按歲月先後給之二年歲課三倍尋乞歸卒於舟

張璉字宗器安陸人景泰庚午鄉薦天順末知四川梓潼縣時流賊趙鐸等攻劫州縣璉練習民兵豫設伏於蛾溪橋賊果夜至火舉伏起遂擒賊首趙鐸等五十人餘衆駭散加同知俸級仍視縣事

沈溥字大霖辰州衛人景泰癸卯鄉薦性剛直疎爽善談論博學疆記凡天文地理陰陽醫術律曆刑名罔弗窮究授廣西靈川知縣民徭雜處難治溥操縱有法民皆安之在任十一年致仕壽至九十

卒

周彞永明人好學善屬文永樂間進士知瓊州府事
守分謹職撫民仁恕人多稱之

歐陽復字時亨桂陽人景泰辛未進士授兵部主事
歷員外郎出補福建泉州知府政平刑簡釋囚致
兩翼日邁疾百姓禱於神以祈祐者千餘人及其
卒也哭之如喪考妣立三太守祠曰蔡公尹公歐
公至今泉民禱輒應大學士彭時記之

王佐蘄州人景泰間任徽州同知民上章挽車以留
遷知饒州府民愛之如徽令其復任父老趨迎罷

市

賀勛湘鄉人景泰丙子鄉薦第一歷官雲南叅政以
直著名與俗寡合引疾還家屏居一室環堵蕭然
孔儒嘉魚人慙直尚氣節景泰庚午鄉薦拜監察御
史數上疏動關大計嘗以星變條陳災異指斥無
所忌諱清軍浙江益樹風節郡縣凜然出補慶遠
知府

史南贇曰大道為公至德躬行王張羅鄭迥抱
真誠穆爾賀黃譚允際昇平謝羅張沈顧義斯行
歐陽何李不墜厥名王馬賀允王功為勳

昌昇

龔成

戴賓

王綸

王璠

馮允中

李端

趙聰

陳廷連

昌昇字明遠襄陽人祖義永樂間以戎功任綏州衛千戶父貴斌扈

英宗復辟拜錦衣衛指揮僉事後調貴州之平越昇幼學于侍郎刑簡以易領順天鄉薦天順甲申進士授戶部主事轉員外郎即中督餉建州擢雲南叅議值蒲蠻叛奉檄宣諭夷皆帖服病歸與李文正公商訂詩法故文正銘其墓曰生不溺貴富功學以成旋棄其羸保茲令名胡取之難而委之輕

乃以其餘托詩以自鳴蓋惜之者深矣

龔晟字德輝蒲圻人封君濟之子也幼聰穎不類凡兒弱冠肆力經史天順八年進士拜監察御史巡畿內多善政時廣西徭倡亂奏建總制府于蒼梧自是將權有統兵力不分陟貴州叅議孫良傳舉嘉靖丙戌進士授工部主事改兵部員外郎陞浙江僉事轉河南叅議山東副使卒于官
戴賓字邦彥荊州人天順甲申進士選南京刑部主事剖決如流獄無冤滯轉員外郎陞四川按察司僉事豪右侵地悉正板圖徯白草寨克之遷兵備

老宿內終後 卷四十二
副使撫守松茂奏設青州守禦所學以化戎俗修葺索橋冠帶番長使知名分以憂歸卒
王綸字廷言襄陽人天順庚辰進士授南京刑部主事歷員外郎即中出補山東按察僉事時齊魯大饑晝晦人相食綸處之咸宜全活甚衆辭歸襄郡杜門讀書不妄交接門人如艾檜張雲漢王瑀徐徵郭做輩俱登鄉舉

王瑤字良玉襄陽人天順丁丑進士歷戶部郎中督運淮揚漕運賴之都御史韓雍征大藤峽徑徑紛起瑤餽餉有功擢河南彰德知府性耿介於人寡

合以憂歸卒

王琰字良璧棗陽人成化乙未進士拜監察御史巡視蘇松諸郡刻剔豪蠹懾服魑強凡輿臺吏胥悉懲之不少貸卒之日囊無贏帛不備殯歛臺中諸史購之始克塋

李端字表正宣城人成化辛丑進士拜留臺監察御史剛毅不撓屢忤權貴逮繫詔獄中官汪直憾之謫永寧安撫司經歷遷温州知府

趙聰字時憲穀城人成化己丑進士授戶部主事監收太倉臨清曹儲克樹風聲節宣盈縮奸豪歛避

而財用賴以不匱

陳廷璉字宗器攸縣人成化丙戌進士初授知府才識通敏善獎進士類召入為南京刑部員外郎中遷延平知府

馮允中字執之成化甲辰進士初知滑縣滑為近畿劇地素稱難治允中操割有餘及拜監察御史權兩淮鹽運濯滌宿蠹巡視蘇松諸郡徭歲荒裁減羨餘後疏免折金備賑民甚庇之

史南贇曰

英皇復辟勵精勤政璧月澄暉珠星朗瑩呂龔賜聲

李戴持正三王趙馮不殄厥問

劉懋

陳策 趙鑾

蔡暹 羅安

程沂 曾鏗

李顯 曾全

汪宣

劉懋字勉之江陵人成化壬辰進士拜刑科給事中糾劾封駁無所避值中貴汪直用事首倡舉劾尋論昭德貴妃專寵杖繫詔獄補浙江僉事督蘇松水利鋤強植弱興利除害以納艱歸不起懋明爽遇事剖決如流疾惡太嚴與人不苟合家居數十年足跡不至城市號不垢子

陳策字廷獻武陵人成化丁未進士初知宜興縣重厚有量政尚循良雖居劇邑綽有可稱徵拜監察

御史謹於持憲論事率循忠厚巡視貴州廣西皆得憲體歲甲子河南監試藻鑑汴人士論翕然歸之

蔡暹字文輝江陵人成化辛丑進士初知泰興縣有謀殺叔母事無左驗累詰不屈時方晴霽倏雷大震侍者股栗暹給之曰後跪者為誰其人驚顧即所謀殺者遂服人皆神之召補太僕寺臣

程沂字宗魯湘陰人成化丁未進士任戶部主事修滯釐弊大司徒葉公甚器之已而摧稅于江州未行卒圭峰羅玘銘其墓曰功以事立事以氣集氣

以志師志以傳遂位以年升年以養增其知言哉李顯字榮宗桃源人祖思政永樂庚子鄉薦為蕙安令顯承祖武成化甲辰進士授戶部主事改南京吏部考功主事轉驗封郎中出補南康知府倣朱文公白鹿洞規興學勸士乞休歸年八十四司馬陳高吾誌其墓

汪宣字德卿江陵人成化甲辰進士初知華亭縣以考覈徵拜監察御史時宦官李廣擅權蠹政事敗頗連大臣太宰屠瀟以為不必深究宣上疏劾之數其黨護及壞選法數事人稱其直巡視松江貪

墨望風解印綬去

趙鑿江陵人成化辛丑進士授大理評事轉寺副正
廉恕詳審多所平反出補雲南按察僉事始巡安
普道訟牒旁午鑿治之無留滯部下土官有不法
及掣肘難治者鑿覈實立寘于法久之勦平菁寨
邊土用安建昌與南詔土酋仇殺往處靖定士論
韙之

羅安自時泰益陽人成化戊戌進士授戶部主事出
補屯田僉事歷四川副使江西按察使調貴州叅
政卒遇事多所建明丘備瀘州功績尤偉為立生

祠

曾鏗字文載永興人成化乙未進士授刑部主事轉
員外郎值平陽府有訟田父淹及蘇州衛有誣殺
人罪者繫獄十餘年鏗往訊立訣出補紹興知府
時驛遞多包攬射利輒均輸薄賦釐弊補役乞休
年七十四終于介全念皆登進士第

曾全字復初成化丁未進士授戶部主事值彗星變
上疏陳四事且言都御史屠鑪不法遂以他事逮
繫詔獄褫秩歸所著有尋樂稿

史南贇曰有官守者孰曰盡職有言責者孰曰

盡忠劉陳汪蔡敷奏惟公程李趙羅明試以庸
魯氏父子克紹成功

劉璟

彭銓

張寬

黃玘

黃頤

劉璟字時瑩武陵人成化丙戌進士初知雷化縣勵
志清苦時邑有姦豪攬權餉率至逋負璟禁戢
嚴甚賦用無匱加意撫字民瘼稍甦辛卯鄉試受
卷於落卷中搜得名士王敷事竣徵拜監察御史
巡視山西憲度嚴明貪吏望風解綬去宗潘嘗訟
民田璟判償民貴戚斂手

彭銓字大用襄陽人成化壬辰進士授大理評事轉

寺正醇朴不諳時山東歲荒往賑之多所全活子

縉登弘治癸丑進士歷官雲南參政

張寬字伯仁襄陽人成化丙戌進士選庶吉士授翰

林檢討還雲南會事興學敦化洱海孚悅

黃玘字敬潤浦圻人合肥教諭煜之孫温江訓導城

之孫也煜宅心忠懇積學該博屢典文衡為時所

宗子城暨壩同中鄉試力行好古雅有父風及孫

玘生天資英毅成化乙未進士授江西高安知縣

為政嚴峻豪宗屏跡徵拜監察御史堅持風紀不

畏強禦時貴州都營苗亂乃勅玘往紀功改土為

流改州為衛厥功居多陟大理寺丞

黃頤字敬德大理寺丞瑄之族兄也為人淳謹質任自然無疾言遽色然博學強記不苟許可成化戊戌進士初知溫縣再調陳留為政豈弟平易近民凡頑民梗化多為條約諭之邑民懷其惠及致仕歸鄉黨尚如諸生時

仵紳字佩之蒲圻人訓導佑之子也性多警慧早游邑庠與江工部克永廖戶部天章為莫逆交督學副使薛綱稱為三傑成化丁未進士授戶部主事監稅九江紳精于心計明習吏事察伍考驗悉中

機宜創置公署代者便之厥後子瑜舉正德庚午鄉試第一丁丑進士授禮部主事提督四夷館上疏論十事勤聖學篤親親開言路敬大臣選諍臣去浮屠極困窮重守令修武備儲人才未幾以爭禮杖卒

江師古字克永蒲圻人元鄉貢存禮之裔也叔父晟司訓吳江志識淵邁師古從之游恒受垂楚勵志苦形畧無倦態弘治癸丑進士授工部主事清江浦管閘時中貴往來無虛日舟經沽頭作威凌轢師古不為屈正德初逸瑾柄國即投疏歸性儉朴

敝衣垢襪陋室匡牀獨脩然肆意然喜風鑑豫測
人禍福先是西涯李文正公有子兆先少負才名
一日延師古往視麻太夫人病即愕然曰太夫人
無恙相國位極人臣恐終乏嗣宜亟圖之後果如
其言師古致政歸自為畫像贊言多近俚亦以自
嘲又題其所居之壁云門對兩山如拱壁腰纏四
水似灣弓行人試問何官府鷗鳥沙頭鷓筍翁

史南贇曰武陵桃源夙稱仙宅棗陽萼川亦號
澤國璟銓之政珰願之德張侂江翁楚邦之傑
風節可嘉孝思維則

謝綱

李愷

李昂

嚴賓

王本義

吳原聰

謝綱字振倫岳州人成化中知高安縣有氓素強梗
綱諭以利害革心為善徵拜監察御史清戎四川
所至無冤民擢山按察副使所著有素軒文集
李愷江陵人成化丁亥知永新縣境內有梅花峒者
頑民梗化不供賦役愷至單車詣峒示以恩威遂
皆感化擢同知吉安府

李昂江陵人少有才名初知長寧縣尚書周洪謨稱
之曰長寧得賢令四湯行以善政稱胡諒以惠民
稱朱思明以賢能稱昂則兼三子之長而有之考

最陞潼州知州

嚴賓字邦賢潛江人成化中知南城縣愛民甚切自奉甚薄清慎勤勞徵拜監察御史子詢詔俱擢賢科

王本義字汝宜松滋人成化丁酉解元授江陰訓導弘治初擢知高安縣每治公事令西吏讀民詞且治且聽竟無違錯操守清白子相之復中解元人以為積德之報

吳原聰通山人成化甲午鄉薦知濟寧州張秋河決尚書劉大夏往治原聰分濬乃克就緒後改知嵩明嵩明俗多盜且無城郭原聰度地營築弘治辛酉米魯福佑寇貴州尚書王軾復令原聰督率事不避難中瘴毒卒

史南曰士階一命貴守三箴之屏之翰克慎克勤綱愷昂賓能保厥名本義原聰無愧此心清之一字尤為難稱

袁宗臯 陳軾 劉思賢 袁經 趙文奎

袁宗臯字仲德石首人父愷景泰庚午鄉薦官廣東布政使宗臯與弟宗夔同舉成化癸卯至弘治庚戌宗臯登進士時

獻皇帝以甲寅之興邸擢宗臯為藩府長史與同采
張景明進講

純一殿撰述

含春恩紀諸集多所啟沃正德辛巳

今上登極宗臯扈從至京陟禮部尚書文淵閣大學
士賜玉帶蟒衣未幾江西撫臣獲謀叛都御史李
士實妾姝色穠麗

上命賜宗臯不數月感疾卒謚榮襄

陳軾字子敬應城人弘治乙丑進士授知縣拜監察
御史出補山西按察副使歷陞戶部侍郎為人小

心謹畏本分無他才能卒于京師

劉思賢字用賓石首人弘治丙辰進士歷戶部郎中
致仕起補知府轉長盧運使遷山東叅政陝西布
政使歷陟工部侍郎恭慎端慤凡事不苟以善終
袁經字大倫寧鄉人弘治庚戌進士授推官拜監察
御史出補按察僉事轉按察使擢僉都御史巡撫
遼東改大同卒于途所著有犀潭集

趙文奎字天章江陵人少與弟文衡勵志講習文奎
登成化丁未進士初知繁昌縣徵拜監察御史巡
視鳳陽清戎兩浙出補雷州知府擢雲南叅政轉

遼東苑馬寺卿貴州布政使召入為應天府尹

史南曰臣讀中秘書時見袁榮襄翊

運入輔想望其羽儀俱年已耄昏謾不可否天下事
而子敬之雅飭用賓之淳篤大倫之嚴毅天章
之端諒亦皆不可少也贊曰宋昌代邸侃侃直
言古有其人榮襄孤騫陳劉袁趙後先輕軒風
度凝峻折檻排闥

何珊

曾大有 王 吳 潘子秀 譚玉瑞
劉暉 楊 遜 朱 衮 黃昭道

何珊字廷佩公安人父皞永樂癸酉鄉薦初知睢寧

縣在邑九載禱雨有應麥秀三岐蝗不入境稱為
異政珊幼孝友弘治癸丑進士授南京刑部主事
轉員外郎中補重慶知府有惠政歷陞按察使陟
布政使珊為人溫粹與物無競居常以身為教與
鄒荏簡公布衣竹杖時相往來結社賦詩有唐香
山宋洛陽諸老風

曾大有字世亨麻城人弘治癸丑進士授知縣徵拜
監察御史振紀啣憲直聲動臺端忤逆瑾除名瑾
敗起擢知府遷按察副使四川叅政江西按察使
陟布政使弟大顯弘治壬戌進士仕至叅議子珽

亦舉嘉靖癸未進士授知獻縣徵拜兵科給事中
轉戶科都給事中謫廣西典史起擢四川僉事
王昊字汝欽衡州人弘治癸丑進士授桐鄉知縣徵
拜監察御史擢雲南副使昊持正不珂積忤權勢
歸卒

潘子秀字人傑江陵人幼穎異日記數千言弘治癸
丑進士授戶部主事有能敵馬端肅公器之調文
選員外郎精于品藻臧否人物允當出補江西提
學副使造就人材振起風教卓有可紀卒年四十
六

譚玉瑞字雅祥茶陵人弘治癸丑進士授行人進司
正性坦直處困無戚容在官無私苦畜妻子僅自給
奉使寧藩餽遺不受居家睦族置義倉設祭田立
鄉約家政井然

劉璩字士約麻城人弘治庚戌進士初知豐城縣蒞
政嚴明庭無私謁事無罣滯以才見稱

楊遜字崇讓均州人弘治癸丑進士拜留臺監察御
史彈劾不避權靈擢淮安知府以慈惠為政愛養
群黎煦如子姓進按察副使

朱衮字子文永州人弘治壬戌進士選翰林院庶吉

士拜監察御史以忤逆瑾謫縣丞瑾敗起擢南京
吏部郎中出補雲南參議轉按察副使進參政為
人朴茂善談論如涌泉懸河清冽澎湃其為文颯
回雲結萃律崎嶇其所蘊人莫能測至今猶可想
見之

黃昭道字文顯平江人弘治己未進士授知縣拜監
察御史以忤逆瑾除名瑾敗起擢僉事轉山東副
使遷雲南參政為人醇朴無華居嘗深居山谷市
人罔見其蹤 薦余廷瑚屢稱之
劉寓生字奇進石首人弘治乙丑進士選翰林庶吉

士與湛甘泉穆玄菴講明性學拜監察御史以忤
逆瑾致仕起擢福建僉事

廖珊字邦重衡陽人正德戊辰進士授行人才識通
敏位不滿德里閔惜之子正僑舉鄉薦

史南贊曰孰謂鄉評月旦可徵孰謂史論春秋

斯明弘治泰和群賢彙征魯王藩譚各効爾能

劉楊何朱適駿有聲黃劉守官邦重揚名

龍誥

周廷徵

范輅

唐鳳儀

劉淑

王廷陳

劉敬

朱衣

喻希禮

龍誥字孔錫攸縣人正德戊辰進士初知臨川縣時

盜起誥率兵往平之遷戶部主事歷郎中督賦江
西有惠政擢廬州知府歲旱民飢誥粥其餓者疏
罷馬價茶芽諸賦置義倉備荒政擢四川副使轉
廣西叅政所著有東洲奏議諸集

周廷徵字公賢麻城人以鄉薦授安福教諭徵拜監
察御史正德辛未擢九江兵備副使蒞政嚴明推
誠馭下綜理周密百度皆舉且樂於課士後以流
賊犯境奮志勦捕發疽而卒

范輅字以載桂陽人正德辛未進士授行人拜監察
御史謫四川宣撫司經歷起擢福建僉事江西副

使適宸豪謀叛輅首撻其樂工殺之誣繫獄除名
事白復起山東副使姪變字汝和甲戌進士拜監
察御史擢四川副使弟永字永官俱領鄉薦

唐鳳儀字應韶邵陽人正德戊辰進士授行人拜監
察御史堂河南道凡廷臣考課精核攸當擢應天
府丞陞僉御史巡撫四川卒

劉淑相字養忠麻城人正德甲戌進士授南京兵部
車駕司主事值

武宗南征邊將中官鰲腫蝟集無敢當其鋒者淑相
請行時冢宰喬白巖為司馬獨壯之出補廣西按

察使擢順天府尹上疏論事為人木強不屈以是除名卒

黎奭字師召今承天府人正德辛未進士授兵科給事中轉南京通政司參議通政擢順天府尹陟工部侍郎卒

侯位字世卿平谿衛人正德辛未進士授知縣召入為兵部主事轉車駕員外武選郎中出補山東參議歷陞都御史巡撫應天督理京儲致仕

賈啟字啟之黃岡人正德辛未進士授知縣徵拜監察御史擢光祿少卿謫徽州推官歷陟都御史巡

延綏

楊禔字介福武陵人成化癸卯鄉試第一弘治丙辰進士選翰林院庶吉士拜兵科給事中持正敢言忤逆瑾致仕瑾敗起遷吏科都給事中轉通政歷陞南京太僕卿

王廷陳字稚欽黃岡人參政濟之子也正德丁丑進士選翰林院庶吉士補吏科給事中諫阻南征謫裕州知州

劉鞞字伯繡衡陽人正德丁丑進士授行人謫國子助教拜監察御史養病子允領鄉薦

陰汝登字民獻崇陽人其先有名天與者為元萬戶
避亂入蜀占藉內江厥後子淑字宗孟成化戊戌
進士官按察副使汝登領正德癸酉鄉薦授安鄉
學諭擢國子監學正拜監察御史巡視雲南事竣
出補鎮遠知府

史南曰人有恒言為政紀綱生前節義死後文
章龍周范唐士節無傷劉黎侯賈政績允藏介
福稚欽文學有光伯繡民獻可謂知方書之末
簡流譽無疆

楚紀卷之四十二

楚紀卷之四十三

皇明賜進士 經筵日講學 國史奉直大夫翰林院侍講學士臣虞道南謹撰
考履外紀前篇

夫履之素也其可以考無咎乎孔子曰吾猶及
史之闕文也又曰其義則丘竊取之矣是故仍
其文則事核而可徵附以義則群分而不窳知
我罪我庶其在茲乎撰考履外紀前篇

司馬徽

黃彥承

鄧方

輔匡

司馬徽字德澡襄陽人清雅有風致善知人漢先主
訪士于徽徽曰識時務者在俊傑此間有伏龍鳳

老後分紀前 卷四十三
雖謂諸葛孔明龐士元也後果如所論梓潼李仁
尹默俱從之游

黃彥承襄陽人性資高朗為沔南望族嘗謂諸葛孔
明曰聞君擇婦身有弱息可堪作配孔明娶之里
人諺曰莫作孔明擇婦正得阿承醜女

鄧方字孔山南郡人也以荊州從事隨先主入蜀為
捷獠屬國都尉因易郡名為朱提太守遷安遠將
軍來降都督章武二年卒蜀史贊曰揚威才幹欬
歔文武當官理任衍衍辯舉圖殞財施有義有叙
輔匡字元弼襄陽人也隨先主入蜀為巴郡太守建

興中徙鎮南為右軍封中鄉侯

馮習字休元南郡人也隨先主入蜀為領軍統馭于
魏亭死難

賈史南曰知人則哲帝堯猶以為難方人為賢仲
尼亦且不暇而况其他乎德操物色孔明于隆
中彥承遂以鳶羅托附乃若方之揚威匡之建
未勲習之死難皆有裨于昭烈者也匪其相知之
深又安能相濟其不足也哉贊曰伏龍高卧鳳
雛軒翥相厥攸止阿承醜女方匡贊謨昕夕與
處習敗魏亭死亦可取

殷觀 張悌 蒯越 賴恭

殷觀字孔休宜城人先主辟為荊州主簿孫權遣使約先主共取蜀或謂宜聽之觀曰若有吳先驅進未能克蜀退為吳所乘即事去矣今但可贊其伐蜀新據諸郡未可輕動吳必不敢越我而獨取蜀也如此進退之計可以收吳蜀之利先主從之遷觀為別駕從事

張悌襄陽人孫皓時為丞相封山都侯晉伐吳諸葛觀大敗走使迎悌悌不去觀自率之曰天下存亡有數豈卿一人所知何乃自苦為悌諭曰仰思今

日是悌死所也恐不得死負名賢矣今當以身殉社稷復何之耶為晉軍所害

蒯越字異度南郡人劉表為荊州刺史時盜賊縱橫道路梗塞表入宜城聞其經畧辟越及蒯良與謀表謂越曰宗賊雖盛而衆未附若袁術因之禍必至矣吾欲徵兵其策焉出越曰理平者先仁義理亂者先權謀兵不在多貴乎得人袁術驕而無謀宗賊率多貪暴有所素養者使人怵之以利必恃衆來使君誅其無道施其才用威德既行襁負而至矣兵集衆附南據江陵北守襄陽荊州八郡可

傳檄而定公路雖至無能為也表曰善乃使越誘
宗賊及江夏賊張虎悉降後曹操封越為列侯誘
賊殺之州境遂平蒯欽者亦襄陽人有名于時
賴恭零陵人荊州牧劉表遣恭代張津為交州刺史
吳匡代史璜為蒼梧太守後恭與巨相失恭還零
陵

史南曰殷觀獻策以拒吳張悌赴義以死晉蒯
越賴恭則又有事于劉表者是亦可書也贊曰
三國鼎分群雄崛起劉焉之後表為刺史殷觀
張悌大吠為主蒯越賴恭靖共是與

魚弘

秦頡

繁仲皇附

魚弘襄陽人身長八尺皙美姿容累從征為軍鋒歷
南譙盱眙竟陵太守嘗謂人曰我為郡水中魚鼈
山中麋鹿田中米穀咸盡也丈夫生如輕塵棲弱
草白駒之過隙耳富貴幾何時於是恣意酣賞侍
妾百餘人金翠服翫車馬皆窮其選同時有徐緄
者亦以豪侈相尚時人語曰北路魚南路徐又有
秦頡者襄陽人仕漢為江夏都尉轉南陽太守行
至宜城嘆曰茲地可卜佳城後卒于官輜車過此
不行遂葬之如其言又有繁仲皇者為青州刺史

皆以豪侈相尚云

史南曰儉德之懿也侈德之衰也謙德之基也
驕德之覆也以儉律身猶恐其放而况侈乎以
謙處物猶忌其滿而况驕乎乃若魚弘之生盡
其欲秦頡之死戀其土而繁氏之俠又有踰焉
惡得弗覆且衰乎贊曰天道虧盈謙乃有益人
道忌滿儉斯可得魚弘鏤牀秦頡勒石繁氏豪
奢均為失德

唐謀 唐宏 唐獻之 附

唐謀零陵人晉武帝咸寧間舉茂才拜武騎常侍南

平吳楚還拜零陵太守境內稱治

唐宏幼穎悟晉懷帝末嘉中舉孝廉拜殿中郎累遷
尚書令又有唐獻之者仕南齊官至都督嶺南諸
軍事

史南曰臣觀零陵志甚稱唐氏為著姓夫浯溪

至柳子摩崖至元子而名始彰若唐氏者其浯
溪之儲秀摩崖之毓靈已乎贊曰浯溪挺秀摩
崖于霄唐氏諸子德音孔昭謀之平吳謙退不
忼宏之應辟孝廉惟修獻之續緒未言延休

樂廣 樂藹 樂法才

樂廣字彥輔其先南陽人徙居江陵父方為魏夏侯
玄參軍廣性冲約有遠識王戎為荊州刺史舉廣
為秀才轉太子舍人出輔元城令人遷中書侍郎
至侍中時王澄胡毋輔之皆任放達廣曰名教中
自有樂地何必乃爾武陵潘京舉秀才共談累曰
廣曰君天才過人但恨寡學耳若學必為詞宗京
感其言向學不倦值世道多虞清已中立任誠保
素而已人莫見其際焉後遷吏部尚書左僕射成
都王穎廣之婿也與長沙王乂構難廣以憂卒三
子凱為齊王驃騎肇為東海王掾謨為吳郡內史

六世孫藹

樂藹字蔚遠徙家江陵生而方頤隆準舉動醞藉雍
州刺史宗慤嘗陳器物試諸甥姪藹時尚幼無所
取遂音之齊豫章王疑為荊州刺史以藹為驃騎
將軍疑嘗問城隍風俗山川險易藹隨問立應若
按圖牒或諧其門如市疑遣覘之藹方閉閣讀書
後為大司馬記室永明八年荊州刺史巴東王子
響叛官曹文書悉為焚盡武帝見藹占對詳敏帝
悅用為荊州從事藹還州繕修廨署一時皆具疑
薨率荆湘二州建碑兆域南康王以藹為諮議參

軍蕭穎胄引藹及宗夫劉坦任以經略天監中擢御史中丞初藹發江陵偶獲八車輻如憲御者至是果符性公果甚稱其職值長沙宣武王塋忽庫中火藹曰晉武庫火張華以為積油久灰既而檢之如其言二年出為平越將軍廣州刺史徐元瑜謀害藹誅之藹姊適徵士劉蚪子法才

樂法才字元備幼與弟法藏俱有名沈約竒之為建康令不受俸金武帝嘉其清節遷太府卿尋改南康內史不拜歷少府卿江夏太守過家劉宅為梵宇棲心物表法藏任征西叅軍子雲美為江陵令

死難

史南曰臣攷武陵志以為樂藹為縣令植桃李民不忍伐有祖廣之遺風及觀梁書則又著其徙家江陵然則何所從乎徵諸國史可也贊曰藹起南陽避亂江陵清談神理歷表宦情廣之高尚藹之清貞法才法藏為梁世臣

席固 薛澄

席固字子堅其先安定人也高祖衝因後秦之亂寓居襄陽仕晉為建威將軍遂為襄陽著姓固少有遠志內明敏外質朴梁大同中為齊興郡守屬侯

景亂固久居郡職士多附之遂有親兵千餘人梁元帝嗣位江陵遷興州刺史固欲自據且以觀時變密謂所親曰今梁氏失政揚都覆沒湖東不能復讎雪恥而骨肉相殘宇文丞相弼啓霸基招僞以禮吾欲決意歸之與卿等共圖富貴左右未有應者固更諭以禍福諸人從之魏大統十五年以地來附宇文泰方欲南取江陵西定蜀漢聞固之至甚禮遇之乃遣使就拜持節驃騎大將軍開府儀同三司大都督封新豐縣公邑二千戶後轉湖州刺史固以未經朝謁心不自安啓求入覲魏主

許之及因至太祖與之歡醺賞賜甚厚進爵靜安郡公增邑并前三千三百戶尋拜昌歸憲三州諸軍事蒞官之處頗有聲績保定四年卒於州時年六十贈大將軍襄豐唐鄧復五州刺史謚曰肅仍勅襄州賜其墓田子世雅字彥文少以孝聞初授車騎大將軍儀同三司除替城郡守順直二州刺史大象末位至大將軍世雅弟世英亦授上開府儀同大將軍

薛澄字景猷河東汾陰人也曾祖弘敞值赫連之亂率宗人避地襄陽澄早喪父家貧躬耕以養祖母

有暇則覽文籍時人未之奇也江表取人多以世
族愷旣羈旅不被擢用然負才使氣未嘗趨世祿
之門京兆常潛度謂愷曰君門地非下身材不劣
何不曳裾數參吏部愷曰世曹躡高位英俊沉下
僚古人以為歎息竊所未能也潛度告人曰此年
少極慷慨但不遭時耳愷終日讀書手自抄略集
一百卷惟郡守元襲時相要之愷與抗禮族人懷
雋每勸之營產業愷亦恬然自處不改其舊普泰
中拜給事中加伏波將軍

史南曰臣攷諸後周書乃見帝固比郡人也苻
愷河東人也而咸徙寓襄陽夫二子以河朔之
英遭仇離之變舉族南遷僑居勝地近日如劉
通政曰乾儲御史良材亦寓茲地豈非以隆中
西踞鹿門東盤固可嘉客執贊曰中原塵起南
國山幽習池未溷蔡洲可遊席固豪士薛愷好
仇興言于邁不失其儔

皇甫方回

葉譚
熊尚

李珪之

皇甫方回安定人玄宴先生謚之子也少遵父操兼
有文才未嘉初博士徵不起避亂荊州閉戶間居
未嘗入城府蠶而後衣耕而後食先人後已尊賢

老後外紀前 卷四三 九
愛物南土人士咸崇敬之刺史陶侃禮之甚厚侃
每造之披素士服望門輒下而進王敦遣從弟廩
伐侃遷侃爲廣州侃將請敦方回諫曰吾聞敵國
滅功臣亡足下新破杜弼功莫與二欲無危其可
得乎侃不從而行敦果欲殺侃賴周訪獲免廩既
至荊州大失物情百姓叛廩迎杜弼廩大行誅戮
以立威以方回爲侃所敬責其不來詣已乃收而
斬之荆土華夷莫不流涕厥後有皇甫璠者建德
三年爲隨州刺史有惠政

葉譚零陵人清簡有節操至洛陽舉孝廉王濟謂曰

君吳楚人也亡國有何秀異乃應斯舉譚曰君不
聞明珠大貝生于江海之濱乎武子無以對後除
郎中拜太子舍人

李珪之字孔璋江夏鍾武人父祖皆爲縣令珪仕晉
遷鎮諮議右軍將軍兼都水使者珪之歷職稱爲
清能轉游擊將軍仍兼少府

熊尚字子尚零陵人其先熊繹後也尚初補桂陽曲
江長轉綏民校尉遷騎都尉改灌陽長

史南曰臣攷楚志乃見葉譚偉辯熊尚清風及
觀晉史則又徵皇甫方回之志節與夫李珪之

之宦業世著勲名有光于楚也贊曰天下有道
行有枝葉天下無道辭有枝葉方回邁難迥然
清節譚之高論徒尚口說珪之清能尚之敦實
舍彼取此庶幾可則

向弘

馮行襲

桓誕

向弘施州人世有施地晉太興三年與向璠等詣臺
求拜除元帝詔特以弘爲折衝將軍當平鄉侯賜
以朝服

馮行襲字正臣均州人唐末山南盜孫喜以衆千人
襲均州刺史呂燁行襲爲州校陰選勇士獨乘小

舟逆喜給云願爲前導以慰安民喜信之乃留其
兵江北獨與行襲潛行喜爲行襲所殺山南節度
使劉巨容表爲均州刺史昭宗以金州爲戎昭軍
拜行襲爲節度使後附于梁遣子勗以舟兵會均
房梁拜爲司宮封長樂郡王卒贈太傅謚曰忠敬
桓誕施州人晉桓玄之裔也流竄太陽蠻中遂習其
俗及長多智謀爲群蠻所歸僭稱施王延興三年
擁沔水以北漁禁以南八萬餘落遣使內屬孝文
嘉之拜征南將軍東荊州刺史命尚書郎常珍偕
誕招降桐栢諸蠻封誕襄陽王聽自選郡縣徙治

於朗陵魏南伐誕請為前驅乃授使持節南征西
道大都督討義陽入宋而還降為公卒謚曰剛子
暉龍驤將軍次子叔興襲爵襄陽公對內書文
史南曰後魏文帝號延興齊海陵王亦同其號
不知志所謂元帝者即後魏明元帝乎向弘見
于郡志然大興又晉元帝號也馮行襲見于五
代史桓誕見于比史姑存之云爾贊曰楚子稱
王春秋削之施陽桓誕曷敢蹈斯向弘邊畧乎
鄉有祠太興延興率多繆詞

朱元英

劉靈遺
成景雋

魏益得
岑善方

裴叔業

朱元英南郡人梁武帝時侯景來降有沙門陸法和
隱于百里州豫知其將叛謂元英曰吾將助擊之
元英曰景為國報効師云擊之何也法和曰正自
如此即往青谿山景果叛元英往問曰景合圖織
其事云何法和曰取果待熟不撩自落吾將待侯
景熟何勞問也後果敗景獲其將于赤沙湖
劉靈遺襄陽人仕劉宋為輔軍將軍元徽元年自淮
南太守徙豫州刺史轉歷陽郡將軍如故徽為散
騎常侍領步兵校尉終蘭陵太守謚曰壯
魏益得襄陽人有才幹膽力過人數從軍征討有功

累遷郡守蕭登莅襄陽以益得為其府司馬承制
拜將軍加大將軍及登稱制進位柱國封上黃侯
加車騎將軍卒贈司空謚曰忠壯進爵為公配饗

登廟

裴叔業其先河東人徙居襄陽仕魏宣武帝為征南
將軍封蘭陵郡公卒于襄陽贈開府儀同三司謚
曰忠武

成景儁仕魏文帝太和中為豫州刺史南征荆楚遂
寓衡之藍山

岑善方字思義其先岑彭之後隨梁宣帝寓襄陽魏

恭帝二年遷襄陽太守加散騎常侍卒贈太常卿
謚曰敬子四人之元之利為司復丞之象為邵陵
令

史南曰臣攷諸六朝書及南北史乃知元英之
訪法和靈遺之仕宋主益得之從蕭登叔業之
軒翊魏宣景儁之隨魏文善方之忠梁裔其跡不
同其事固有攸往也贊曰六朝屋社諸臣佐命
率濟權謀罔由中正數子溝會黷武啓釁或謚
為忠或謚為敬或配廟庭或遷鄉井三復遺編

田爰以志警

田康 趙國珍 鄧正直 韓約

康施州人貞觀中仕至黔州都督邇臨趙蠻遙距夷獠西屬昆明南接洱河山川阻深莫知道路趙氏世為酋長夷子渠師姓季氏與西趙皆南蠻別種勝兵各萬人未嘗通中國康諷諭之皆遣使入朝

趙國珍施州人開元中有趙君道代謝氏為牂牁刺史封夜郎郡公國珍天寶中有戰功閣羅鳳叛宰相楊國忠兼劍南節度使以國珍有方畧授黔中都督屢敗南詔保障五溪十餘年天下亂其部獨

寧仕至工部尚書又房武在唐為施州刺史韓愈撰其妻鄭氏表

鄧正直衡陽人以行義聞陳末定初歐陽頎刺衡州雅知其賢辟為廬陽令罷征弭盜修城濬河興學崇教人多稱之

韓約武陵人仕唐為虔州刺史歷兩淮發運使權安南都護文宗時拜金吾大將軍約初在郡修屯田儲餽餉多著政績

史南曰惟楚有材惟晉用之豈必借才異代哉存乎其人耳施介楚蜀之交衡居鼎澧之間而

田趙之不受變于夷鄧韓之能振拔于俗固可
紀也贊曰巫峰增岷川靈所鍾衡嶽吸紫嶽祇
攸崇德山桃源誕育英雄田趙鄧韓報國有功

劉晏

甄逢

梁震

徐仲雅

劉晏字士安曹州南華人玄宗封泰山晏始八歲獻
頌行在帝奇其幼命宰相張說試之說曰國瑞也
即授太子正字公卿邀請旁午號神童名震一時
再遷侍御史祿山亂避地襄陽永王璘署晏右職
固辭詔拜度支郎中兼侍御史領江淮租庸事代
宗立復為京兆尹戶部侍郎領度鹽鐵轉運租庸

便

甄逢初名憲臺甄濟之子其先定州無極人天寶十
載以左拾遺召未至而安祿山入朝求濟玄宗授
范陽掌書記值來瑱辟為襄陽叅謀拜禮部員外
郎宣城楚昭王廟墮地廣濟立墅其左瑱死屏居
七年大曆初江西節度魏少游表為著作郎兼侍
御史卒逢少孤長耕城野自力讀書不謁州縣歲
飢節用以給親里大穰則振其餘於鄉黨貧狹者
朋友有緩急輒出家貲周贍以義聞逢常以父名
不得在國史欲詣京師自言元和中袁滋表濟節

行與權臯同科宜載國史有詔贈濟秘書少監而
逢與元稹善稹移書於史館修撰韓愈曰濟棄去
祿山及其反有名號又逼致之執不起卒不汙其
名夫辨所從於居易之時堅再操於利仁之世而
猶巽懦者之所不爲蓋拂人之心難而害已之避
深也至天下大亂死忠者不必顯從亂者不必誅
而眷眷本朝甘心白刃難矣哉若甄生者弁冕不
加其身祿食不進其口直布衣一男子耳及亂則
延頸受刃分死不回不以不必顯而廢中不以不
必誅而從亂在古與今蓋石一焉愈荅曰逢能修

身幸於方州大臣以標目其先人事載之天下耳
目徹之天子追爵其父弟四品赫然驚人逢與其
父俱當得書矣由是父子俱顯名

梁震蜀人後梁開平元年進士寓江陵高季昌慕其
才名留之欲辟爲判官震耻不就欲去恐禍及乃
曰震素不懷榮公不以震爲愚願以白衣侍樽俎
許之乃築室于土州披鶴氅稱荆臺隱士每詣村
乘黃牛高從誨時過其廬贈遺持厚

徐仲雅其先關中人徙居長沙年方弱冠馬希範辟
置天策府與拓拔恒李弘臯廖匡圖等爲學士時

造九龍殿沉香雕龍飾以金寶重歛供役仲雅規
正不從後邊鎬入長沙仲雅辭去周行逢慕其名
辟之不仕

史南曰楚地廣邈多高山大川而夫魁梧卓犖
之材跣跣佃儻之士多栖馬是故劉晏齊人也
寓襄陽甄逢燕人也寓宜城梁震蜀人也寓江
陵徐仲雅秦人也寓長沙其所建樹率皆有聲
豈地靈使然抑異材之難得也贊曰劉晏蚤慧
名動燕公乾沒財利鮮克有終甄逢力學宜城
寄蹤顯名橋梓元禎表忠梁震負才跡寄渚宮

逍遙郊野以暢厥衷仲雅應辟派衍關中徙居
沙土規諷發滕

李植 李燾

李植字元直泗川臨淮人徙居潭州初植兩領鄉薦
從父中行從蘇長公游太史晁無咎曰此國士也
以女妻之靖康初向子諲薦植補迪功即督餉募
士厥功居多高宗駐師鉅野間植以布衣統兵至
喜賜之食曰得一士如獲拱壁豈特軍餉已乎植
上表勸進高宗即位守札獎諭尋以奉議郎知潭
州湘陰縣時楊公蕩折植披荆棘立縣治發廩賑

貧撫窮恤孤張浚督師薦知鄂州大寇馬友孔彥
舟未平植修戰艦習水戰分爲二翼大破之以功
擢朝奉大夫通判荆南府秩滿遷戶部員外郎時
秦檜當國植丐祠奉親寓醴陵十九年杜門不出
檜死子誣復薦之帝曰朕故人也方欲大用以毋
老辭知桂陽軍毋沒廬墓有白鷺朱草之瑞服闋
起知瓊州改知徽州直秘閣遷荆湘大提點乾道
二年直寶文閣知建康府上言防江十策語在宋
史後以老還湘時胡安國父子家南嶽下劉錡家
湘潭相與往還言及國事每憂形于色年七十六
卒有臨淮集十卷胡銓叙之子五人汝虞知桃源
汝士知黃州汝士知昌化軍

李燾字仁甫眉州丹稜人唐宗室曹王後也徙居瀏
陽燾登紹興八年進士調奉陽簿乾道五年遷秘
書少監直顯謨閣出爲湖北轉運副使歲饑發鄂
州大軍倉賑之僚友執不可燾曰吾自任不以累
諸君也進秘閣脩撰子屋中制科坐累知常德府
豐辰沅靖四州初慮營田勞手擾民燾請度田立
額且約帥臣張栻列奏詔從之境產茶商賈交兵
爲敵燾撫之明堂禮成擢敷文閣待制所撰長編

史南曰臣攷宋史見南渡之後鉅家率冒播遷江南有若胡康侯傳經于紫蓋張南軒講道于嶽麓朱昂作賦于湘臯范如圭貽訓于荆門卓哉大雅不群爾矣若李植藏書于湘潭李壽撰史于瀏陽固皆曠世之儲才與區之挺秀者也贊曰湘水澄澈中涵太虛瀏山嶒岷上聯皇穹植之徙潭杜門著書燾之倚瀏撰史盈車邈矣高風立懦起愚

范如圭 何鎬

范如圭字伯達建陽人父舜始登進士第官從事郎卒于荆門如圭從舅胡文定公受春秋學鄉舉類試皆第一對策廷中極論人主正心立學之方力詆和議言甚壯切授左從事郎武安節度推官時虜騎已陷長沙湘中大亂如圭崎嶇避地荆門艱苦百罹而志業益脩江東安撫司機宜文字近臣交薦召試除秘書省正字改宣義郎遷校書郎兼史館校勘會秦檜力建和議虜使鼎來而朝廷草創無所館將闢秘書省以處之如圭亟見趙鼎曰

秘府謨訓所藏可使腥羶處之乎檜以是怒又寄
荆門中更變亂乃謁告奉柩歸塋故鄉飯蔬帶經
往返數千里既窆即以病告差主管台州崇道觀
杜門讀書不與人事者十餘年尋起通判邵州又
通判荆南府事省荆南戶口賦稅數十萬時檜已
死如圭所與同時去國者多召用如圭亦被命入
對高宗猶記前議勞問久之因進言爲治以知人
爲先知人以清心寡慾爲本語甚懇至時宗藩並
建儲位未定道路竊有異言如圭雖在遠外獨深
憂之嘗劄至和嘉祐間名臣章奏凡三十六篇合

爲一書至是囊封以獻且言曰願陛下深考群言
仰師成憲斷以公道無貳無疑則天下幸甚人或
以越職危之如圭不顧也上見其疏歎之曰如圭
可謂愛君矣遂留覽因返泉州卒朱熹銘其墓曰
嗚呼惟公廣博易良不耀其章不劇其方斤斤其
容坦坦其行懇懇其言循循其政剛毅勁切以時
發之賁育雖強孰能奪之晚殫厥猷遂啓明聖萬
世之傳一語而定凡今有慶孰匪公功我銘斯闕
以詔無窮

何鎬字叔京福建人父克仕爲左朝奉郎通判辰州

事生鎬于辰州既長孝謹有器識嘗受中庸大學於東平馬伸所服勤不怠又以其忠節事狀移書太史忤秦檜下吏竄南方瀕死不恨操存杜門終日澹然若無營者至於論說古今指陳得失則又明白慷慨可舉而行由此南州之爲程學者自鎬始用父任辰州恩補官授泉州安溪主簿再調汀州父之以年格循資調潭州善化令將行而率鎬爲人清夷恬曠廉直惠和談經論事簡易條暢所著書有易論語說史論詩文數十卷晚築書堂南坂上名以高遠用見己意朱熹銘其墓曰清直而

溫夷易而方惟學不懈厥歆以光孰啓于家而居于邦孰豐其粹而畜其長帝罔弗衷氣或交沴既欽厥承君則奚愧莫尊匪德莫乂匪言銘以相之

刻石墓門

東甲至今其十四晉而

興都志列如圭爲荆門人辰州志亦以鎬爲流寓及

致諸晦菴所撰二子墓銘則知其咸爲閩人而

反葬壬鄉然其流風餘韻猶有存者故及之贊

荆門山翠近浥岷江辰溪霞綺遠結湘邦伯

達進講君德攸光叔京授學士習允臧爰以錄

之以表其長

張錫字旣之其先京兆人曾祖山甫嘗從唐僖宗入蜀蜀平徙家漢陽錫進士甲科試秘書省校書郎

張錫字旣之其先京兆人曾祖山甫嘗從唐僖宗入蜀蜀平徙家漢陽錫進士甲科試秘書省校書郎

補南昌令遷著作郎知新州初建學于州自是人

始知學再遷太常博士監染院詔選能吏治畿縣

乃以錫知東明至令其下曰吾所治者三恃力恃

富恃贖者吾所先也治有聲績遷樞密直學士李

及薦為監察御史丁謂貶崖州議還利地錫疏謂

姦邪弄國本與天下共棄之今復還是違天下意

向是止健雷州王清昭應宮災連繫甚衆錫言天

災反以罪人恐重天怒願修德以應之會論者衆

獄遂解遷殿中侍御史權三司鹽鐵判官出為荆

湖北路轉運使改尚書兵部員外郎還判度支知

勾院為京東轉運使淄青齊濮鄆諸州人冒耕河

壩地數起爭訟者亦息判鹽鐵勾院為河北轉運

使改江淮制置發運使召兼侍御史知雜事判大

理評事權知諫院安撫利夔路歷度支鹽鐵副使

喪母起復擢天章閣侍制知河中府累遷右司郎

中以龍圖閣直學士知滑州遷右諫議大夫知審

官翰林院侍讀學士判大常寺國子監卒贈工部
侍郎錫淳重清約雖貴奉養如少賤時讀書老而
彌篤初舉廣文館進士考官任隨以爲第一及隨
死無後錫屢調其家

張君房安陸人宋真宗時爲著作郎時日本遣使入
貢詔本國建寺詞臣譔記君房代爲之夷使待命
君房醉飲市樓索之不獲直院大窘後楊億改閑
忙令曰世上何人最號忙紫微失却張君房

張景字晦之公安人少從河東柳開游悉出家書畀
之嗜學益力時富春孫僅沛國朱巖成紀李庶景

與麗益聲華日振真宗詔有司計偕天下士景居

首列調館陶簿坐累謫全州尋爲房襄二州文學

參軍陳堯咨知其才薦爲寶應簿淮島僉雜馮戾

峨巫景剪除之後通理真州事天禧二年卒所著

有洪範玉霸數十篇宋景文公祁銘曰儻才章号

懿淳孝至膺仕号難老謇皇皇号晚獲伸發吾懷

号露珍神茫茫号安究尚立言号不朽

張翹沅陵人神宗時章惇經畧湖北翹上書言南北

江利害惇啣之或以告翹翹曰苟利於人死不惡

也惇無以害焉晚居深山中以文史自娛杜門不

出幾二十年

史南曰臣聞諸孔子云吾猶及史之闕文也是故春秋書夏五書郭公以存疑耳吾觀國史至張錫則有傳君房則見於說家及考宋文鑑張景則有銘張翹則見于郡志近公安鄒督府廷澤賦以邑志則又以景為隱士仁宗時人也故紀之考履豈志有弗及詳國史耶贊曰大別宛起漢水所經黃山秀麗繚繞洞庭賦之君房夙負才名晦之及翹國史有聲胡為郡志文獻無徵

王質

金烈

謝淳

附

王質字景文其先鄆州人後徙興國質博通經史善屬文游太學與九江王沆齊名阮每云聽景文論古如讀酈道元水經名山大川貫穿周匝無有間斷咳唾皆成珠璣質與張孝祥父子游深見器重孝祥為中書舍人將薦質舉制科會去國不果著論五十篇言歷代君臣治亂謂之朴論紹興三十年舉進士召試館職不就明年金主完顏亮南侵御史中丞汪澈宣諭荆襄又明年樞密使張浚都督江淮皆避為屬入為太學正時孝宗屢易相質

上疏曰陛下即位以來慨然有爲而陳康伯葉義
間汪澈在廷皆不以為才獨徘徊康伯難於進退
遂用史浩而浩不稱用張浚而浚無成今湯思退
專任國政又且數月臣度其終無益也夫宰相之
任一不稱則志沮康伯持以和和不成浚持以戰
戰不驗又持以守守既困思退又持以和陛下亦
嘗深察和戰守之事乎李牧在鴈門法主於守守
乃有戰祖逖在河南法主於戰戰乃有和羊祜在
襄陽法主於和和乃有守今陛下之心志未定規
模未立或告金弱且亡而吾兵甚振陛下則勃然

有勒燕然之志或告吾力不足恃而金人且來陛
下即委然有盟平涼之心或告吾不可進金不可
入陛下又蹇然有指鴻溝之意使會三者爲一天
下烏有不治哉天子心知質忠而忌者共讒其年
少好異論遂罷去會虞允文宣撫川陝辟質偕行
一日令草檄契丹文援毫立就辭氣激壯允文起
執其首曰景文天才也入爲樞密院編修官允文
當國孝宗命擬進諫官允文以質鯁亮不回可右
正言時中貴人用事多畏憚質陰沮之出判荆南
府奉祠山居絕意祿仕淳熙十五年卒先是金人

入寇湖盜蜂起金烈者湘鄉人慷慨上書又謝淳
字景祥瀏陽人孟彥卿判潭州值潰卒亂淳率民
兵為先鋒手刃數十人力屈被執為賊所殺朱熹
請為立祠

史南曰臣攷宋史見王質徙居興國上書論天
下事而卒不見售豈權臣當國匿不以聞史又
稱天子心知質忠為讒者所沮詩有之讒人罔
極交亂四國可畏也哉贊曰得庸才易得奇才
難保初節易保晚節難景文國士曰擊時難排
雲叫閹虎豹守關栖霞入谷松菊怡顏嗟乎苦

人才節奇觀

張徽 張徽 張從道 張迪 張淵道

張徽景陵人元祐中司馬光范純仁與之友第徹七
持使節入剖郡符公清超邁計口受俸其遺表美
不忘君嗣後有張迪者元豐間舉進士累官諫議
大夫至元時有張淵道與弟從道俱安陸人同舉
進士淵道官秘書監從道官通城尹永樂四年知
徽州府改知永平府

張樞字子發零陵人性豪爽善屬文紹聖中自太學
上書言孟后事不報姪子紆字公飭性高尚嘗游

紫岩先生門與張南軒為友

張山翁字君壽其先普州人景定三年進士德祐元年為荊湖宣撫司幹官鄂守張晏然議納款山翁以書讓之晏然既降山翁被執令降山翁不屈行省官賈思貞義之貸不殺後居黃鵠山聚徒教授而終有南紀緇林藏雲山相鋤諸編

史南曰元祐中司馬君實自洛入汴兒童走卒皆願復相以開熙治而徽乃與之同心其人品可知矣乃樞奮起大學上書論天下事雖陳東歐陽澈何以加焉而山翁之抗志不屈願老黃

鵠息心白雲又何其烈也徽之遺表迪之納誨固有足徵而淵道從道亦可書也贊曰君實純臣元祐輔政克贊徽猷厥趨亦正迪樞後先史冊輝映淵道從道順受明命山翁樹節天植其性黃鵠白雲山水交映

唐儒 唐績 唐麟 唐徹 唐如晦附
曹裕 曹靖 曹肅附

唐儒字景仁零陵人宋仁宗皇祐元年登馮京榜進士初授陽朔令弟彥輔彥材同時俱為縣令嗣後有唐績少警敏嗜學能文登哲宗元符進士為衡山令通判鼎州擢福州運判帝諭之曰卿久歷州

縣知民疾苦其具以聞績敏奏詳允嗣是有唐開
者高宗建炎初登進士通判蕪州有唐容者博學
強記與唐麟樂韶同學人稱三傑後舉進士為豐
城令政績茂彰尋知邕州交趾入寇容率兵征之
有功而歸隱于建昌之麻姑山號雲壑老人唐徹
者字子卓績之族人也謁劉靜春先生授以近思
錄學益式弘歷官廉慎徹弟復字子立受學于呂
東萊之門號敬齋登嘉定甲戌進士為衡陽尉如
晦字幼光博雅好學易山齊板顏其亭曰善齋人
鑑字德明亦善屬文楊誠齋萬里深與納交一日

問卜人鑑者以詩曰聞爇爐香要決疑不疑何用
卜著龜聖人自有常編在進退存亡豈不知後築
室于州西植竹萬竿誠齋題曰玉立齋

曹裕耒陽人舉進士為潭州司祿參軍能辨枉獄後
罕溧水值歲旱蝗漕使以歲計不足諷諸邑裕曰
吾能忍視其死而不救乎卒以實聞子洪舉進士
為永興令邑小民貧上供匱乏洪漢曰吾八歷縣
未嘗橫歛豈倒行逆施乎遂棄官歸

曹靖郴州人性孝友嘉祐中為益陽令有美政去後
民思之累官尚書比部郎知賓州黃庭堅為作善

政頌稱爲御史嚴而不殘使民寬而不弛厥有曹
肅者字士先蚤膺鄉薦晚就恩科初任道州寧遠
簿再監廬陵酒稅平生安貧樂道四方學者多從
之游著述數十卷於詩尤工識者謂有騷人風
史南曰唐氏起零陵有若儒之克正家範而績
之警敏麟之博雅徹之淳實寔繼之曹氏起郴
衡有若裕之克守官箴而靖之孝友肅之澹寔
繼之寔皆鄉之望也贊曰零陵勝域山峙川澄
篤生諸唐世有休聞載觀郴地嶽秀連衡曹氏
長發適駿有聲

戴國忠

米芾 邢繹 邵應豹

陳順夫

彭天益

陶岳

戴國忠光化人慶曆中進士歐陽脩稱其忠信篤于
朋友孝弟孚于宗族禮義達于鄉閭仕終屯田郎
中

米芾字元章其先吳人寓居襄陽爲文奇險天秀善
大書哲宗時補書學博士遇無爲州巨石輒秉笏
下拜爲觀察使所劾出知淮陽軍子友仁字元暉
亦善書從高宗渡江紹興中通判太平住至兵部
侍郎敷文閣直學士人以大小米稱之

郭昱初舉周顯德中進士上書于宰相趙普紹署襄
州觀察推官潘美鎮襄陽辟昱為幕僚雍熙中流
寓襄樊

彭天益攸縣人元祐二年領鄉薦崇寧初為太學博
士出為湖南提舉大觀中上言時政力抵權姦致
仕居司空山所著有瑞麟集

陶岳祁陽人累官太常博士知瑞州余靖稱不持端
硯者自包孝肅後及岳而已後歷五郡凡四十餘
年

邢繹其先鄭人父倬仕宋知鼎州因家焉繹補蔭為

五郡倬自襄州歸起知興國軍秩滿復歸武陵

陳純夫永興人宋元豐初監舉第一尋以易經魁省
試京師號為湖南夫子累官通奉大夫後間居以
文自娛卒年八十六

朱輅郴州人紹聖間登進士通判邵州再補郴州洗
冤澤物有甘露降于州署

岳宗字次姚桂陽州人紹興二年登進士累官朝請
郎

邵應豹字啓南號菊逸其先淳安人父寓武昌生應
豹遂家焉宋時登進士授鼎州司戶叅軍歷知江

夏澤州後階淳安縣男

史南曰戴國忠行孚于文忠米元章名並于松
雪與夫陶岳見稱于余靖固有可徵爾矣乃若
昱之遇宰衡天益之抵權奸純夫之號夫子皆
一節之士也而邢繹朱輅岳宗雖登甲科列近
侍宵爾無間而應豹之受封亦可紀也贊曰脩
為名儒靖為直諫許可持重戴陶堪嘆天益純
夫金輝玉粲繹邈輅宗要亦可贊應豹受封里
閭有閑

盛章

龔興

梅應春

雷應春

葉蓋

盛章字季文襄陽人政和元年以朝奉郎直龍圖閣
京畿轉運副使充集賢殿修撰知蘇州二年四月
以治狀有功就除顯謨閣侍制轉朝請郎賜紫金
魚袋三年二月春進木心大士字及申請府額重
建譙樓閏四月除知貞定府五月仍知蘇州六月
以招徠賈客舖戶勾過新鈔轉一官九月詔赴闕
陞顯謨閣直學士依前知平江府十二月除樞密
直學士宣和元年七月臣僚言章守平江日於豪
民居世英家借貸動數千百緡請求囑託悉出其
手物論喧騰章遂以女妻之以弭外議

龔輿湘陰人乾道五年進士剛介廉潔為浙東檢法
隨憲按部郡饋送皆不受憲聞大慚以其已受者
還之後知湘鄉民戶逋官賦輿指已俸代輸終福
建運幹身後家無儋石儲

梅應春廣濟人皇祐丙辰進士為餘干令以趙葵薦
陞瀘州安撫使淳祐間進禮部侍郎

雷應春郴州人以詩擅名累官監察御史首疏時相
忤權貴出知全州弗就歸隱北湖後知臨江軍安
靜不擾嘗欲城新淦以備不虞當路阻之及己未
之亂臨江倉卒無備人始服其先見所著有洞庭

王虹日邊盟鷗清江諸集

葉蓋桂陽人熙寧間試才難賦魁上庠後知郴州
郭鴻字儀仲政和中登進士授澧陽令歲飢捐俸賑
民擢奉議郎

易祓寧鄉人淳熙中累官翰林學士至禮部尚書號
山齋所著有周易總義周禮釋禹貢疆理記漢南
北軍制嗣後有易炎正茶陵人筵祐間登進士為
寧鄉丞

史南曰程子以清慎勤為官箴朱子以孝弟忠
信為家法乃若章之勤輿之清應春之慎益之

敏鴻之信被之忠鎬之學皆可紀也而雷應春則又高于梅應春數等矣贊曰濟濟群英湖南之望出千載不立三代上得意忘言見數知象盛龔諸君勵志邁往

歐慶

歐海

歐陽澤

歐陽程

歐陽言

歐慶字貽孫光化人在宋時以同三禮出身累官彰州推官知永春縣為人忠信孝弟居官廉貧宗族之孤幼者皆養于家與同邑太傅張士遜屯田郎中戴國忠雖位有崇卑而鄉人稱之無異及卒歐陽脩為表其墓子世英鄧城令世勛舉進士

歐海茶陵人乾道中領鄉薦時楊誠齋以文鳴持所作謁之令熟讀語孟後復見之誠齋大喜丁酉登進士授零陵令有勸農十詩真西山甚稱其為風化之助遂以表聞

歐陽澤道州人少貧克本州戶房吏因弟程登宋太平進士第仕至屯田員外郎乃陳乞罷後發憤讀書次科亦請文解咸平二年中孫暨榜進士官至推官節度使

歐陽程道州人少貧為郡吏郡後有池常淬鐵為戎器名鐵作池植亭其傍一日太守於吏牘間得幅

紙紀池亭之勝有寒影倒吞凌漢樹冷光高浴半
天星之句問知為程語大驚異之與之金使歸為
學登進士第累官屯田員外郎

歐陽言宋高宗建炎初登第性廉退任遷江令嘗獲
冒爵人陳椿以嘗言散秩固辭不受後宰劇邑訊
刑獄愈有聲尋倅賓陽遷員外郎致仕故廬蕭然
僅蔽風雨

史南曰歐氏歐陽氏蓋世家云慶之寓光化海
之寓茶陵澤與程言之寓營道也其流風遺度
猶有存者贊曰襄衡相望不啻千里彼美人兮

若隔湘水諸歐樹名率由坦履慶海澤言彤管

有煒

賀德英

羅孝芬

李平西

鍾正甫

陳康民

曹進之

張康

黃照隣

黃彥舉

詹邈

石康

王元春

楊齊賢

暢淳夫

秦顯

劉夢應

許炳

張晏然

張顯

張顯

張顯

張顯

張顯

賀德英湘鄉人七歲熊文淳熙間父以訟繫獄乃詣
縣自乞廷試以贖父罪令問所習對以通毛詩春
秋語孟策與詩賦令各出一題援筆立就遂薦諸
朝與金起岩等同賦德英第一卒年十四

羅孝芬平江人宣和中登進士甲科仕吏部郎中靖

康問歸建秀野亭

李平西即西坪平江人父純皇祐中進士平士亦登元符中進士知澧州累遷樞密院承旨金人入寇平西同李綱上守禦策宰相何栗不能用

鍾正甫武陵人宋治平二年登進士與米芾游樞密蔣之奇薦之起為廣東轉運使蔡京當國置其籍于黨碑

陳康民咸寧人宋仁宗皇祐間登進士仕至太中大夫

畢由長沙人宋真宗時以吏部郎官兼王府侍讀一

日遇講泛寒奏指臨湘七都稞租里人德之

鄭向耒陽人祥符間省元文天祥撰題名記教授周道興刻之

趙觀張嘉猷俱石首人舉宋進士為翰林學士

劉彥舉寧鄉人舉宋進士為翰林學士

曹進之耒陽人嘉泰初廣昌令既視事金芝產廨中嘉禾生于野人以為政化所感

張康湘潭人少孤力學宰相江萬里留夢炎皆重之元世祖時中丞崔或祀南嶽訪康隱居表上之授祕書監著作佐郎時有張韶者道州人以易學舉

仕至朝列大夫海北道僉事

黃照麟桂陽人舉宋進士仕為職方郎中嘗讀書於郡西芙蓉山石林亭鄉人號為職方巖子植字立之元熙二年進士官朝請郎知貴州

黃珙衡陽人資質方正嘗以善行誨人長子師道仕為屯田郎中次子師日為屯田員外郎皆以清白名

詹邈施州人宋元祐壬午進士

石濼光化人仕宋為朝散郎

王元春慶元中進士歷官吏部侍郎有清譽

楊齊賢字子見寧遠人少穎悟無書不讀兩應制科免省類試中第一

暢淳夫襄陽人仕至翰林學士卒贈文肅子敏仲亦有才名

秦噩衡州安仁人宋嘉定十二年登劉涓榜進士深於理學號南潤

劉夢應衡州臨武人宋咸淳元年登徐儼夫榜進士官朝請郎所著有明善錄

許炳字仲明嘉定中登進士授寧鄉縣尉

張晏然廣濟人咸淳間守鄂降金仕致禮部尚書

張顥桃源人登進士第有才幹為時所稱

史南曰臣攷諸通志錯雜無犯臧榮緒莒人也
車胤潤人也范如圭閩人也而繫之楚何居乃
若賀德英中童子科羅孝芬李平西鍾正甫陳
康民畢由鄭向趙觀劉彥舉曹進之黃昭隣王
元春楊齊賢秦噩劉夢應許炳張晏然張顥俱
進士科而米友仁張康詹邈暢淳夫其初或以
辟舉寧闕疑焉耳贊曰童而秀兮士之翹楚士
而文兮世亦希偶拔茅彙征兮神功不有持心
如水兮權衡不部

趙璠 王夢應

趙璠衡山人宋咸淳十年甲戌進士歲丁丑三月張
虎起兵寶慶邵之新化潭之安化益陽寧鄉湘潭
大擾弗靖元將薩里變攻之五月朔璠暨叔父漂
起兵勤王自湘鄉馳奏行在授璠軍器監於是朝
奉郎長沙張唐進士湘潭熊桂省魁劉斗元皆應
之明年督府敗績元兵焚嶽祠璠漂遁莫知所在
張唐被執元行省叅政崔斌欲降之唐罵曰紹興
至今五十年乃我祖魏公收拾撐持今日若降何
以見魏公于地下遂遇害

王夢應，攸縣人。宋咸淳十年，與趙璠同舉進士。調廬陵尉。元兵陷臨安，夢應率同邑吳希奭、陳子全起兵勤王。馳疏奉聞，又遣使區仲舉通桂帥馬暨旬。月，響應。七月，復袁州。元兵敗走，已而湘部諸縣陷。沒子全中流，矢死。希奭戰死于醴陵。夢應收合潰卒，奔永新，依顏明叔，闔門疫死。

史南曰：金兵入汴時，則岳武穆督師而劉鼎孫尹耕叟皆楚人也。元兵入浙時，則文丞相起兵而趙璠、王夢應皆楚人也。嗟乎！豪傑之士雖無文王，猶興而況忠義之不可泯乎？贊曰：匡山濤險楚江波濶，不有君子其何能國。趙王諸君萬夫之杰，文山獨之孤忠大節。

陳桂孫

子仁子

陳桂孫，茶陵人。父天福，歲凶，發廩平糶，貧不能糶者，周之。有羽士從天，福丐米，福畀之，不受。其值羽士題其壁曰：他年桂子與蘭孫，平步玉堂與金馬。其子桂孫、蘭孫，果登甲第，置經濟倉。歲豐則隨時入糶，歲凶則視值出糶，自撰序志。子仁子，字同甫，宋季，請漕舉屬國，易姓弗仕。營東山書院，以自終焉。博學好古，著述尤富，輯文選補遺四十卷。廬陵趙

文叙曰同甫少講學家庭以為昭明所選封禪書
何如仲舒三策劇秦論何如更生封事九錫文何
如出師表且詔令人主播告之章奏疏人臣經濟
之畧凡此未備宜錄補遺其為世教民彝之助豈
小補哉其甥學錄譚紹校之今行于世

史南曰臣艤棹維揚有葛生澗者持文選補遺
于舟中讀之見其用心精密著論詳縝嗣後梅
國劉司寇衍為廣文選所收雖富未必如仁子
之醇也博雅君子其必有所擇矣贊曰淮巖桂
茂澧浦蘭香紉蘭倚桂雲霽青蒼厥孫仁子藝

圃幽光薄言采之湘水浩茫

李祁

李祁字一初號希蘧茶陵人元至順癸酉登進士高
第應奉翰林丁祖父母及父憂乞外補同知婺源
州迎母就養文學政事炳然可稱尋提舉學校於
江浙方駸駸嚮用顧以親老就養姑蘇以母憂扶
喪還鄉里擢江浙儒學提舉至正壬辰兵起道梗
不赴乃自茶陵避地吉安之永新每與諸將言必
陳君臣大義聞他將不守輒憤切食不下咽談及
國家事至流涕不自勝雖無官守而憂國之心不

忘祁尤善楷書所著有雲陽集永新千戶俞茂爲
刻梓以傳余闕撰序

史南曰臣觀李文正公文集乃見述其先世爲
唐忠武王之後祁登李齊榜第二人其所繇來
者遠矣及攷元朝試錄乃見祁之經義諸篇渢
渢乎其猶有古之風也哉君子是以論其世也
贊曰雲陽毓秀皇雩錫靈篤生希遠為國良臣
延至西涯統領縉紳演綸調鼎黃閣昭勲

何維

何維蒲圻人元延祐元年中鄉試時常德孫以忠沅

州李壽醴陵李明孫才名相埒而維尤爲竒特逸
氣煥發莫之與京是科梓行求賢詔一篇摘辭爾
雅有兩漢詔令之風維中鄉試第十一名元文選
載求賢詔云粵稽唐虞咸以得賢為盛故元凱舉
庶績熙黎獻臣九功叙朕獲嗣丕基夙夜祇懼思
得吉士以圖治理咨爾在位于茲有年乃作養未
臻厥効貢舉未見其人豈招採之道未至與抑奉
行者弗虔與茲賓興制舉詳酌古今法周選士豈
弟君子來游來歌時也是用申命中外體予至懷
其公乃心慎乃事職郡縣者嚴保選司貢舉者精

考覈務得經明行修之實則予一人汝嘉其或徇私習故邦有常刑欽哉毋替朕命

史南贊曰胡塵翳空其何能國下詔求賢邦有常則彼美何君學既有得敷奏以言為上為德

楚紀卷之四十三



